





絕妙好詞箋

絕妙好詞七卷南宋弁陽老人周密公謹所輯宋人選本朝詞如曾端伯樂府雅詞黃叔暘花菴詞選皆讓其精粹蓋詞家之準的也所采多紹興迄德祐間人自二三鉅公外姓字多不著夫士生隱約不得樹立功業炳煥天壤僅以詞章垂稱後世而姓字猶在若滅若沒閒無人爲從故紙堆中抉剔出之豈非一大恨事耶津門查君蓮坡研精風雅耽玩倚聲披閱之暇隨筆劄記輯有詩餘紀事如干卷于是編尤所留意特爲之箋不獨諸人里居出處十得八九而詞中之本事詞外之佚事

以及名篇秀句零珠碎金攬拾無遺俾讀者展卷時恍然如聆其笑語而共其游歷也予與蓮坡有同好向嘗綴拾一二每自矜剏獲會以衣食奔走不克卒業及來津門見蓮坡所輯頗有望洋之歎并舉以付之次第增入焉譬諸掇遺材以裨建章投片瓊以厠懸圃其爲用不已微乎蓮坡通懷集益猶不忘所自必欲附賤名於簡端辭不得已因述其顛末如此云乾隆戊辰閏七夕前三日錢唐厲鶚書於津門之古春小茨

絕妙好詞箋目錄

卷一

張孝祥

范成大

洪邁

陸游

陸淞

韓元吉

姚寬

吳琚

辛棄疾

劉過

謝懋

章良能

陳亮

真德秀

劉光祖

蔡桷

洪咨夔

岳珂

張鎡

盧祖臯

張履信



周文璞

徐照

俞灝

潘枋

劉翰

劉子寰

張良臣

卷二

姜夔

劉仙倫

孫惟信

史達祖

高觀國

劉鎮

張輯

李石

李泳

鄭域

王岵

蔡松年

韓鶚

卷三

劉克莊

吳潛

尹煥

趙以夫

姚鏞

羅椅

方岳

楊伯岳

周晉

楊纘

翁孟寅

趙汝茺

馮去非

許棐

陸叡

蕭泰來

趙希邁

趙崇礪

趙希彭

王澡

趙與鐮

樓槃

鐘過

李肩吾

黃簡

陳策

黃曷

李振祖

薛夢桂

曾揆

卷四

吳文英

翁元龍

鄭楷

黃孝邁

江開

譚宣子

陳逢辰

樓采

奚滅

趙聞禮

施岳

卷五

陳允平

張樞

李演

莫崙

丁宥

儲泳

趙汝迳

樓扶

史介翁

周端臣

楊子咸

湯恢

何光大

趙潛

趙淇

毛珞

潘希白

李珏

利登

曹籩

劉瀾

張龍深

卷六

李彭老

李萊老

應灑孫

王億之

余桂英

胡仲弓

尙希尹

柴望

朱藻

黃鑄

王同祖

王茂孫

王易簡

張桂

張槃

張林

朱昞孫

吳大有

張炎

趙崇霄

范晞文

鄭斗煥

曹良史

董嗣杲

卷七

周密

王沂孫

趙與仁

仇遠

絕妙好詞箋目錄

絕妙好詞箋卷一



弁陽老人周密原輯

宛平查為仁

錢唐厲鶚

同箋

張孝祥

孝祥字安國號于湖烏江人紹興二十四年廷對第一授承事郎簽書鎮東軍判官累遷中書舍人直學士院兼督府參贊軍事領建康留守尋以荆南湖北路安撫使進顯謨閣直學士致仕有于湖集詞一卷

湯衡序紫微詞云于湖平昔為詞未嘗著藁筆酣興健頃刻即成無一字無來處

念奴嬌

過洞庭

洞庭青草近中秋更無一點風色玉界瓊田三萬頃著
我扁舟一葉素月分輝明河共影表裏俱澄澈悠然心
會妙處難與君說 應念嶺表經年孤光自照肝膽皆
冰雪短鬢蕭疎襟袖冷穩泛滄溟空濶盡吸西江細斟
北斗萬象為賓客叩舷獨嘯不知今夕何夕

四朝聞見錄云張于湖嘗舟過洞庭月照龍堆金沙盪射公得意命酒唱歌所作詞呼群吏而酌之日亦人子也其坦率皆類此
崔山魏了翁跋此詞真蹟云張于湖有英姿奇氣著之湖湘間未為不遇洞庭所賦在集中最為傑特方其吸江酌斗賓客萬象時詎知世間有紫微青瑣哉

西江月

丹陽湖

問訊湖邊柳色重來又是三年春風吹我過湖船楊柳
絲絲拂面 世路如今已慣此心到處悠然寒光亭下
水連天飛起沙鷗一片

輿地紀勝云丹陽湖在當塗縣東南六十九里杜預注云春秋宣城縣西南有桐水出白石山西北入丹陽是也
按景定建康志載此詞云題溧陽三塔寺按志三塔湖一名梁城湖在溧陽縣西七十里又云溧水西承丹陽湖自東壩成丹陽湖水不復通本縣界岳珂玉楮集亦云溧陽三塔寺寒光亭柱上刻張于湖詞自當以建康志為據

清平樂

光塵撲撲宮柳低迷綠鬪鴨闌干春詰曲簾額微風繡

蹙碧雲青翼無憑困來小倚雲屏楚夢不禁春晚黃鸝猶自聲聲

菩薩蠻

東風約畧吹羅幙一簾細雨春陰薄試把杏花看溼雲

嬌暮寒 佳人雙玉枕烘醉鴛鴦錦折得最繁枝暖香

生翠帷

雲一作紅

詞旨警句盡吸西江細斟北斗萬象為賓客叩舷獨笑不知今夕何夕念奴嬌寒光亭下水連天飛起沙鷗一片西江月

能改齋漫錄去年今日從駕遊西苑彩仗壓金波看水戲魚龍曼衍寶津南殿宴坐近天顏金盃酒君王勸頭上宮花顫六軍錦繡萬騎穿楊

箭日暮翠華歸擁鈞天笙歌一片如今關外千里未歸人前山雨西樓晚望斷思君眼此陳濟翁驀山溪也舍人張孝祥知潭州因宴客妓有韻此至金盃酒君王勸頭上宮花顫其首自為之搖動者數四坐客忍笑指目者甚眾而張竟不覺也

癸辛雜識張于湖知京口王宣子代之多景樓落成于湖為大書樓扁公庫送銀二百兩為潤筆于湖却之但需紅羅百匹於是大宴合樂酒酣于湖賦詞命妓合唱甚懽遂以紅羅百匹犒之

吳禮部別集詩話于湖玩鞭亭晉明帝覘王敦營壘處自温庭筠賦詩後張文潛又賦于湖曲以正湖陰之誤詞皆奇麗警拔膾炙人口張安國賦滿江紅云千古淒涼興亡事但悲陳迹凝望眼吳波不動楚山叢碧巴滇綠駿追風遠武昌雲旆連天赤咲老姦遺臭到如今留空壁邊書靜烽烟息通輶傳銷鋒鏑仰太平天子聖明

無敵蹙踏揚州開帝里渡江天馬龍為匹看東南佳氣鬱匆匆傳千億雖間采溫張語而詞氣亦不在其下嘗見安國大書此詞後題云乾道元年正月十日筆勢奇偉可愛于湖詞西江月十里輕紅自笑兩山濃翠相呼意行著脚到精廬借我繩床小住解飲不妨文字無心更狎鷗魚一聲長嘯暮烟孤袖手西湖歸去

范成大

成大字致能號石湖吳郡人紹興二十四年進士孝宗時累官權吏部尚書拜參知政事進資政殿學士提舉洞霄宮卒謚文穆有石湖集詞一卷

醉落魄

栖烏飛絕絳河綠霧星明滅燒香曳簾眠清樾花影吹

竹滿地淡黃月 好風碎竹聲如雪昭華三弄臨風咽
鬢絲撩亂綸巾折涼滿北窗休共軟紅說

朝中措

長年心事寄林扃塵鬢已星星芳意不如水遠歸心欲
與雲平 留連一醉花殘日永雨後山明從此量船載
酒莫教閑却春情

眼兒媚

酣酣日脚紫烟浮妍暖試輕裘困人天氣醉人花底午
夢扶頭 春慵恰似春塘水一片縠紋愁溶溶洩洩東

風無力欲皺還休

憶秦娥

樓陰缺闌干影卧東廂月東廂月一天風露杏花如雪
隔烟催漏金虬咽羅幃暗淡燈花結燈花結片時春
夢江南天濶

霜天曉角

晚晴風歇一夜春威折脉脉花踈天淡雲來去數枝雪
勝絕愁亦絕此情誰共說惟有兩行低鴈知人倚畫

樓月

詞旨警句花影吹笙滿地淡黃月醉落魄燈花結
片時春夢江南天濶憶秦娥惟有兩行低鴈知人
倚畫樓月霜天曉角

劉克莊後村集詩話范石湖南柯子云悵望梅
花驛凝情杜若洲香雲低處有高樓可惜高樓
不近木蘭舟緘素雙魚遠題紅片葉秋欲憑江
水寄離愁江已東流那肯更西流
澄懷錄范石湖云淳熙己亥重九與客自閩門
汎舟徑橫塘宿霧一白垂垂欲雨至綵雲橋氛
翳豁然晴日滿空風景閒美無不與人意會四
郊刈熟露積如繚垣田家婦子著新衣畧有節
物挂帆遡越來溪潦收淵澄如行玻璃地上菱
花雖瘦尚可采擷穰石湖叩柴荆坐千岩觀
下菊叢中大金錢一種已爛漫穠香正午薰入
酒盃不待轟飲已有醉意其旁丹桂二畝皆盛
開多欒枝芳氣尤不可耐携壺渡石梁登姑蘓
後臺躋攀勇往謝去巾輿筇杖石稜草滑皆若
飛步山頂正平有均堂蘚石可列坐相傳為吳

故宮閒臺別館所在其前湖光接松陵獨見孤
 塔之尖少北墨點一螺為崑山其後西山競秀
 縈青叢碧與洞庭林屋相賓大約目力踰百里
 具登高臨遠之勝始余使虜是日過燕山館嘗
 賦水調首句云萬里漢家使後每自和桂林云
 萬里漢都護成都云萬里橋邊客明年徘徊藥
 市頗歎倦游不復再賦但有詩云年來厭把三
 邊酒此去休哦萬里詩今年幸甚獲歸故園偕
 隣曲二三子酬酢佳節於鄉山之上乃復用舊
 韵首句云萬里吳船泊歸訪菊籬秋
 石湖詞浪淘沙黯淡養花天小雨能慳烟輕雲
 薄有無間官柳絲絲都綠徧猶有春寒空翠溼
 征鞍馬首千山多情若是肯俱還別有玉杯承
 露冷留共君看玉杯官舍中牡丹絕品也
 菩薩蠻云雪林一夜收寒了東風恰向燈前到
 今夕是何年新春新月圓綺叢香霧隔猶記踈
 狂客留取縷金
 旛夜蛾相並看

洪邁

邁字景廬號野處又號容齋鄱陽人忠宣公皓子
 紹興十五年登第兄文惠适文安遵皆中博學宏
 詞科由是三洪名滿天下累遷吏禮二部員外郎
 尋進煥章閣學士知紹興告老以端明殿學士致
 仕卒謚文敏有容齋五筆夷堅志萬首唐人絕句
 野處類藁行于世

踏莎行

院落深沉池塘寂靜簾鉤捲上梨花影寶箏拈得鴈難
 尋篆香消盡山空冷 釵鳳斜欹鬢蟬不整殘紅立褪
 慵看鏡杜鵑啼月一聲聲等閒又是三春盡

夷堅志紹興間余在臨安試詞科三場畢與五
 友同過抱劍街孫氏小樓夜月如晝正臨闌憑

几兩燭結花燦然若連珠孫倡黠慧白坐中日
 今夕桂魄皎潔燭花呈祥五君較藝蘭省其高
 掇不疑請各賦一詞為他日佳話何自明即操
 筆作浣溪沙一闕云草草杯盤訪玉人燈花呈
 喜坐添春邀郎覓句要清新黛淺波嬌情脉脉
 雲輕柳弱意真真從今風月屬閒人眾傳觀歡
 賞獨恨其末句失意余續臨江仙日綺席流歡
 歡正洽高樓佳氣重重釵頭小篆燭花紅直須
 將喜事來報主人公桂月十分春正半廣寒宮
 殿匆匆姮娥相對曲闌東雲梯知不遠平步躡
 東風孫滿酌一觥相屬相勸日學士必高中此
 瑞殆為君設也已而果奏名賜第餘皆不偶

陸游

游字務觀山陰人以蔭補登仕郎隆興初賜進士
 出身范成大帥蜀為參議官以文字交不拘禮士
 人譏其類放因自號放翁嘉泰初詔同修國史陞
 寶章閣待制有劍南集詞二卷

劉潛夫云放翁稼軒一埽纖艷不事穿鑿高則高
 矣但時時掉書袋要是一癖

朝中措

梅

幽姿不入少年場無語只淒涼一箇飄零身世十分冷
 淡心腸江頭月底新詩舊恨孤夢清香任是春風不
 管也曾先識東皇

烏夜啼

金鴨餘香尚暖綠窗斜日偏明蘭膏香染雲鬟膩釵墜
 滑無聲冷落鞦韆伴侶闌珊打馬心情繡屏驚斷瀟
 湘夢花外一聲鶯

又

紈扇嬋娟素月紗巾縹緲輕煙高槐葉長陰初合清潤

雨餘天 弄筆斜行小草鈎簾淺醉閑眠更無一點塵

埃到枕上聽新蟬

鶴林玉露陸務觀農師之孫有詩名恃酒頽放
因自號放翁作詞云橋如虹水如空一葉飄然
煙雨中天教稱放翁晚年為韓平原作南園記
除從官楊誠齋寄詩云君居東浙我江西鏡裏
新添幾縷絲花落六回踈信息月明千里兩相
思不應李杜翻鯨海更羨夔龍集鳳池道是樊
川輕薄殺猶將萬戶比千詩蓋切磋之也然南
園記唯勉以忠獻之事業無諛辭晚年和平粹
美有中原承平時氣象朱文公喜稱之
耆舊續聞陸放翁官南昌日代還有贈別詞云

雨斷西山晚照明悄無人幽夢自驚說道去多
時也到如今真箇口行遠山已是無心畫小樓
空斜掩繡屏你豪早收心呵趁劉郎雙鬢未星
又閑居三山日方務德侍郎携妓訪之公有詞
云三山山下閑居士巾屨蕭然小醉閑眠風引
飛花落釣船並不載於集
齊東野語放翁在蜀日有所盼賦詩云碧玉當
年未破瓜學成歌舞入侯家如今顛顛蓬窻底
飛上青天妒落花出蜀後每懷舊遊多見之賦
咏有云金鞭珠彈憶春游萬里橋東罨画樓夢
倩曉風吹不斷書憑春雁寄無由鏡中顏鬢今
如此席上賓朋好在否篋有吳牋三百箇擬將
細字說春愁又云裘馬清狂錦水濱最繁華地
作閑人金壺投箭消長日翠袖傳杯領好春幽
鳥語隨歌處拍落花鋪作舞時茵悠然自適君
知否身與浮名孰重輕又以此詩櫜括作風入
松云十年裘馬錦江濱酒隱紅塵黃金選勝鶯
花倚踈狂驅使青春弄笛魚龍盡出題詩風

月俱新自憐華髮滿紗巾猶是官身鳳樓會記
當時語問浮名何似身親欲寫吳牋說與這回
真箇閒人前輩風流
雅韵猶可想見也

陸 淞

淞字子逸號雲溪山陰人耆舊續聞云陸辰州子
逸左丞佃之孫晚以疾廢卜築於秀野越之佳山
水也放傲世間不復有榮念對客
則終日清談不倦尤好語前輩事

瑞鶴仙

臉霞紅印枕睡覺來冠兒還是不整屏間麝煤冷但眉
峰壓翠淚珠彈粉堂深晝永燕交飛風簾露井恨無人
說與相思近日帶圍寬盡 重省殘燈朱幌淡月紗窗

那時風景陽臺路迴雲雨夢便無準待歸來先指花梢
教看却把心期細問問因循過了青春怎生意穩

耆舊續聞云南渡初南班宗子寓居會稽爲近屬
士園亭甲於浙東一時坐客皆騷人墨士陸子逸
嘗與焉士有侍姬盼盼者色蕪殊絕公每屬意焉
一日宴客偶睡不預捧觴之列陸因問之士卽呼
至其枕痕猶在臉公爲賦瑞鶴仙有臉霞紅印枕
之句一時盛傳逮今爲雅唱後盼盼亦歸陸氏
張叔夏云景中
帶情屏去浮艷

韓元吉

元吉字无咎號南礪許昌人門下侍郎維四世孫
東萊先生呂伯恭之外舅也官至吏部尙書有焦
尾集詞一卷子
澆仲止有詩名

水龍吟

書英華事

雨餘疊巘浮空望中秀色仙都是洞天未鎖人間春老
 玉妃曾墜錦瑟繁絃鳳簫清響九霄歌吹問分香舊事
 劉郎去後知誰伴風前醉 回首暝煙千里但紛紛落
 紅如洗多情易老青鸞何許詩成誰寄斗轉參橫半簾
 花影一溪寒水悵飛鳥路杳行雲夢遠有三峰翠

者舊續聞云元豐中縉雲令開封李長卿女慧性過人姿度不凡染疾逝殯於邑之仙巖寺三峰閣李公罷因昇歸宣和庚子青溪寇起焚燎無遺惟三峰閣獨存主簿以為解舍濟南王傳慶及內表曹穎偕來館曹于廳治之東一夕有女子打扇而至與語皆出塵氣詰其姓氏曰開封李長卿女季

萼其名英華其字辟穀有年身輕於羽知子鰥居故來相慰唱和殆無虛日曹有親陳觀察挽之從軍將就道英華與訣曰妾與君之緣斷矣子宿緣寡淺塵業未償他日當有兵難敬授靈香一瓣有急請燕以告當陰有所護不然亦無如之何也曹公勇為朔方之行不意獲譴麾下追惟英華之言欲取所遺香燕之軍行無宿火卒正法英華詩有云醒酒清風搖竹去催詩小雨過山來非詩人所易到也
 文獻通考云英華集三卷李季萼為鬼仙縉雲人傳其詩亦怪矣
 墨莊漫錄云處州縉雲簿廳為武尉司頃有一婦人常現形與人接妍麗閒婉有殊色其來也異香芬馥非世間之香自稱曰英華或曰綠華前後官此者多為所惑永嘉蔣輝遠為邑簿祠以香火其怪遂絕

好事近

汴京賜宴

凝碧舊池頭一聽管絃凄切多少梨園聲在總不堪華
髮杏花無處避春愁也傍野花發惟有御溝聲斷似
知人嗚咽

金史交聘表云大定十三年三月癸巳朔宋遣試
禮部尚書韓元吉利州觀察使鄭興裔等賀萬春
節按宋孝宗乾道九年為金世宗大定十三年南
澗汴京賜宴之詞當是此時作

姚寬

寬字令威號西溪會稽續志姚寬岷人以父舜明
任補官權尚書戶部員外郎樞密院編脩官詞章
之外頗工篆隸及工伎之事請用韓世忠舊法以
意增損為三弓合彈弩詔許之既成矢激二里所
中皆沒羽又嘗論大駕鹵簿指南車得古不傳之
法所著有西溪集十卷注司馬遷史記一百三十

卷西溪叢語一卷玉璽書一卷葉水心跋西溪集
云公著書二百卷古今同異無不槩括惜其盛年
不預采錄晚始召對
殿中忽感風眩而死

菩薩蠻

斜陽山下明金碧畫樓返照融春色睡起揭簾旌玉人
蟬鬢輕無言空竚立花落東風急燕子引愁來眉愁
那得開

生查子

郎如陌上塵妾似堤邊樹一作絮相見兩悠揚蹤跡無尋
處酒面撲春風淚眼零秋雨過了別離時還解相思

否

吳琚

琚字居父號雲壑汴人憲聖太后之姪太寧郡王益之子歷尚書郎部使者直學士慶元間以鎮安節度使留守建康遷少保卒謚忠惠有雲壑集

柳梢青

元日立春

綵仗鞭春椒盤迎旦斗柄回寅拂面東風雖然料峭終是寒輕帶花折柳心情怎捱得元宵放燈不是東園有些殘雪先去踏青

浪淘沙

雲葉弄輕陰屋角鳩鳴青梅著子欲生仁冷落江天寒食雨花事關情池館晝盈盈人耐寒輕一川芳草只銷凝時有入簾新燕子明日清明

又

岸柳可藏鴉路轉溪斜恁機鷗鷺立汀沙咫尺鐘山迷望眼一半雲遮臨水整烏紗兩鬢蒼華故鄉心事在天涯幾日不來春便老開盡桃花

景定建康志引此詞題云游青溪呈馬野亭野亭跋其後云秦淮海之詞獨擅一時字未聞米寶晉善詩然終不及字若公可謂兼之矣辛酉季春承議郎充江南東路轉運司主管文字馬之純謹書

武林舊事淳熙九年八月十八日駕詣德壽宮奉迎上皇觀潮百戲撮弄各呈技藝上皇喜曰錢唐形勝天下所無上起奏曰江湖亦天下所獨宣諭侍臣各賦醉江月一闕至晚呈上以吳琚為第一其詞曰玉虹遙挂望青山隱隱恍如一抹忽覺天風吹海立好似春霆初發白馬凌空瓊鼇駕水日夜朝天闕飛龍舞鳳鬱蔥環拱吳越此景天下應無東南形勝偉觀真奇絕好是吳兒飛絲幟蹴起一江秋雪黃屋天臨水犀雲擁看擊中流楫晚來波靜海門飛上明月兩宮賞賜無限至月上始還

辛棄疾

棄疾字幼安號稼軒歷城人耿京聚兵山東節制忠義軍馬留掌書記奉表來歸高宗召見授承務郎差簽判江陰累官浙東安撫加龍圖閣待制樞密院都承旨德祐初以謝枋得請贈少師謚忠敏

有稼軒長短句十二卷

劉後邨云公所作大聲鏗鞳小聲鏗鉤橫絕六合掃空萬古其穠麗綿密者亦不在小晏秦郎之下

摸魚兒

更能消幾番風雨
怱怱春又歸去
惜春長怕
花開早何
况落紅無數
春且住
見說道
天涯芳草無歸路
怨春不語
筭只有殷勤
畫簷蛛網
盡日惹飛絮
長門事
準擬佳期
又誤蛾眉
曾有人妬
千金縱買相如賦
脉脉此情誰訴
君莫舞
君不見玉環飛燕
皆塵土
閑愁最苦
休去倚危欄
斜陽正在煙柳斷腸處

鶴林玉露云辛幼安晚春摸魚兒詞意殊怨斜陽
煙柳之句比之未須愁日暮天際是輕陰者異矣
使在漢唐時寧不賈種豆種桃之禍哉愚聞壽皇
見此詞頗不悅然終不加罪可謂盛德也已

瑞鶴仙

梅

雁霜寒透幙正護月雲輕嫩冰猶薄溪奩照梳掠想含
香弄粉靚妝難學玉肌瘦弱更重重龍綃襯著倚東風
一笑嫣然轉盼萬花羞落寂寞家山何在雪後園林
水邊樓閣瑤池舊約鱗鴻更仗誰託粉蝶兒只解尋花
覓柳開徧南枝未覺但傷心冷淡黃昏數聲畫角

祝英臺近

寶釵分桃葉渡煙柳暗南浦怕上層樓十日九風雨斷
腸點點飛紅都無人管倩誰勸啼鶯聲住鬢邊覩應
把花卜歸期纔簪又重數羅帳燈昏哽咽夢中語是他
春帶愁來春歸何處却不解將愁歸去

貴耳集云呂婆呂正巳之妻正巳爲京畿漕有女
事辛幼安因以微事觸其怒竟逐之今稼軒桃葉
渡詞因此而作

詞旨警句應把花卜歸期纔簪又重數祝英臺近
是他春帶愁來春歸何處却不解帶將愁去同上
歸潛志党懷英辛棄疾少同舍屬金國初亂辛
率數千騎南渡顯于宋党在北擢第入翰林二
公皆有榮寵後辛退閑有鷓鴣天云壯歲旌旗
擁萬夫錦韉突騎渡江初燕兵夜捉銀胡象漢
箭朝飛金僕姑思往事歎今吾春風不染白髭

鬚都將萬字平戎策換得東郊種樹書
 清波別志稼軒在上饒屬其室病呼醫對脉吹
 笛婢名整整者侍側乃指以謂醫曰老妻病安
 以此人為贈不數日果勿藥乃踐前約整整去
 因口占好事近云醫者索酬勞那得許多錢帛
 只有一箇整整也合盤盛得下官歌舞轉淒涼
 賸得幾枝笛笛覩著者般火色告媽媽將息一時
 戲譁風調不群

太平清話鉛山縣南二里許有稼軒書院分水
 嶺下厥墓在焉張堃古山樂府水龍吟酌辛稼
 軒墓云嶺頭一片青山可能埋沒凌雲氣遐方
 異域當年滴盡英雄清淚星斗撐腸雲煙盈紙
 縱橫遊戲謾人間留得陽春白雪千載下無人
 繼不見見戟門華第見蕭蕭竹枯松悴問誰料理
 帶湖煙景瓢泉風味萬里中原不堪回首人生
 如寄且臨風高唱逍遙舊曲為先生醉

劉過

過字改之號龍洲道人太和人
 有龍洲集詞一卷黃叔暘云改之稼軒之客詞多壯語蓋學稼軒者也
 陶九成云改之造詞贍逸有思致

賀新郎

老去相如倦向文君說似而今怎生消遣
 衣袂京塵曾染處空有香紅尙軟料彼此魂銷腸斷
 一枕新涼眠客舍聽梧桐踈雨秋聲顫燈暈冷記初見
 樓低不放珠簾捲晚妝殘翠鈿狼籍淚痕凝臉
 人道愁來須殢酒無奈愁多酒淺但託意焦琴
 紈扇莫鼓琵琶江上曲怕荻

花楓葉俱淒怨雲萬疊寸心遠

龍洲詞題云去年秋余試牒四明賦贈老娼至今天下與禁中皆歌之江西人來以為鄧南秀詞非也

唐多令

蘆葉滿汀洲寒沙帶淺流二十年重到南樓柳下繫船
猶未穩能幾日又中秋黃鶴斷磯頭故人今在否舊
江山總是新愁欲買桂花重載酒終不似少年遊

龍洲詞題云安遠樓小集侑觴歌板之姬黃其姓者乞詞於龍洲道人為賦此唐多令同柳阜之劉去非石民瞻周嘉仲陳孟參孟容時八月五日也花菴詞選題云重過武昌

醉太平

情高意真眉長鬢青小樓明月調箏寫春風數聲思
君憶君魂牽夢縈翠銷香暖雲屏更那堪酒醒

詞旨警句翠銷香暖雲屏更那堪酒醒醉太平

吹劍錄稼軒帥越招劉改之不去寄情沁園春日斗酒彘肩風雨渡江豈不快哉被香山居士約林和靖與東坡老駕勒吾回坡謂西湖正如西子濃抹淡妝臨照臺二人者俱掉頭不顧只管傳杯白云天竺去來看金碧崢嶸圖畫開更縱橫一澗東西水遶兩山南北高下雲堆浦日不然暗香疎影何似孤山先探梅須晴去訪稼軒未晚且此徘徊此詞雖粗而局段高與三賢游固可親視稼軒視林白之清致則東坡所謂淡妝濃抹已不足道稼軒富貴焉能免我哉

江湖紀聞劉改之性疎豪好施辛稼軒客之稼
軒帥淮時改之以母病告歸囊橐蕭然是夕稼
軒與改之微服登倡樓適一都吏命樂飲酒不
知為稼軒也命左右逐之二公大咲而歸即以
為有機密文書喚某都吏其夜不至稼軒欲籍
其產而流之言者數十皆不能解遂以五千緡
為改之母壽請言于稼軒稼軒曰未也令倍之
都吏如數增作萬緡稼軒為買舟于岸舉萬緡
于舟中日可即行無如常日輕用也改之作念
奴嬌為別云知音者少筭乾坤許大著身何處
直待功成方肯退何日可尋歸路多景樓前垂
虹亭下一枕眠秋雨虛名相誤十年枉費辛苦
不是奏賦明光上書北闕無驚人之語我自匆
忙天不肯贏得衣裾塵土白壁堆前黃金買咲
付與君為主尊鱸江上浩然明歸去
游宦紀聞于於菊礪高九萬處見蘓紹叟手書
憶劉改之摸魚兒一闕云望關河試窮遙眼新
愁似絲千縷劉郎豪氣今何在應是九疑三楚

堪恨處便拚得一生寂寞長羈旅無人寄語但
弔麥傷桃邊松倚竹空憶舊詩句文章事到底
將身自誤功名難料遲暮鶉衣簞食年年瘦受
侮世間兒女君信否盡縣簿高門歲晚誰青顧
何如引去任槎上張騫山中李廣商畧儘風度
紹叟有冷然詩集十卷行於世

謝懋

懋字勉仲有靜寄居士樂章二卷

黃叔暘云居士樂章吳坦伯明為序稱其片言隻字憂玉敲金蘊藉風流為世所賞

驀山溪

厭厭睡起無限春情緒柳色借輕煙尙瘦怯東風倦舞
海棠紅皺不奈晚來寒簾半捲日西沉寂寞閑庭戶

飛雲無據化作溟濛雨愁裏見春來又只恐愁催春去
惜花人老芳草夢淒迷題欲徧瑣窗紗總是傷春句

風入松

老年常憶少年狂宿粉棲香自憐獨得東君意有三年
窺宋東墻笑舞落花紅影醉眠芳草斜陽 事隨春夢
去悠揚休去思量近來眼底無姚魏有誰更管領年芳
換得河陽衰鬢一簾煙雨梅黃

浪淘沙

黃道雨初乾霽靄空蟠東風楊柳碧珍珍燕子不歸花

有恨小院春寒 倦客亦何堪塵滿征衫明朝野水幾
重山歸夢已隨芳草綠先到江南

霜天曉角

桂花

綠雲剪葉低護黃金屑占斷花中聲譽香和韻兩清潔
勝絕君聽說當時來處別試看仙衣猶帶金庭露玉

階月

詞旨警句燕子不歸花
有恨小院春寒浪淘沙

章良能

良能字達之麗水人淳熙五年進士除著作佐郎
嘉泰元年爲起居舍人寧宗朝居兩制登政地謚

文莊有嘉
林集百卷

小重山

柳暗花明春事深
小闌紅芍藥已抽簪
雨餘風軟碎鳴禽
遲遲日猶帶一分陰
往事莫沉吟
身閒時序好且登臨
舊游無處不堪尋
無尋處惟有少年心

齊東野語外大父文莊章公自少好雅潔性滑稽居一室必汛埽坊飾陳列琴書親朋或譏其齷齪無遠志一日大書素屏云陳蕃不事一室而欲埽除天下吾知其無能為矣識者知其不凡間作小詞極有思致先妣能口誦數首小重山云云

陳亮

亮字同甫號龍川永康人隆興初以解頭薦上中興五論不報居太學上舍紹興四年光宗親策進士擢為第一授建康軍簽判未至官病一夕而卒端平初謚文毅有龍川集詞二卷

水龍吟

鬧花深處層樓畫
簾半捲東風軟
春歸翠陌平莎茸嫩
垂楊金淺遲日催花
淡雲閣雨輕寒輕暖
恨芳菲世界
游人未賞都付與鶯和燕
寂寞憑高念遠
向南樓一聲歸雁
金釵鬪草青絲勒馬
風流雲散羅綬分香
翠綃封淚幾多幽怨
正銷魂又是踈煙淡
月子規聲斷

詞旨屬對羅綬分香翠綃封淚
龍川詞好事近咏梅云的
樂三兩枝點破暮煙
蒼碧好在屋簷斜處
傍玉奴吹笛月華如水
過林塘花影弄苔石欲
向夢中飛蝶恐幽香難覓

真德秀

德秀字希元浦城人慶元五年進士授南劍州判官繼試中博學宏詞科為太學正紹定中召為禮部侍郎拜參知政事進資政殿直學士提舉萬壽觀卒謚文忠學者稱西山先生有真文忠公集五

卷十四

蝶戀花

紅梅

兩岸月橋花半吐紅透肌香暗把遊人誤盡道武陵溪
上路不知迷入江南去先自冰霜真態度何事枝頭

點點胭脂汗莫是東君嫌淡素問花花又嬌無語

劉光祖

光祖字德修號後谿簡池人登進士第慶元初官侍御史改司農少卿遷起居郎終顯謨閣直學士提舉嵩山崇福宮卒有鶴林詞一卷

洞仙歌

敗荷

晚風收暑小池塘荷靜獨倚胡牀酒初醒起徘徊時有
香氣吹來雲藻亂葉底游魚動影空擎承露蓋不見
冰容惆悵明妝曉鸞鏡後夜月涼時月淡花低幽夢覺
欲憑誰省也應記臨流凭闌干便遙想江南紅酣千頃

鶴林詞踏莎行埽徑花零閉門春晚恨長無奈
東風短起來消息探茶蘼雪條玉蕊都開徧晚
月魂清夕陽香遠故山別後誰拘管多情於此
更情多一枝鶼罷還重撚
魏了翁鶴山集劉左史光祖之生正月十日李
夫人之生以十九日賦浪淘沙寄之鶴外倚樓
看雲颭晴天天高雞犬礙雲關掉臂雙仙留不
徹還住人間客佩振珊珊來賀平安年年直待
卷燈還似是天公
偏著意占破春閑

蔡柟

柟字堅老南城人宣和以前人沒於乾道庚寅曾
公卷呂居仁輩皆與之倡和有雲壑隱居集三卷
詞有浩歌集一卷趙希弁讀
書附志云嘗為宜春別駕

鷓鴣天

病酒厭厭與睡宜珠簾羅幙捲銀泥風來綠樹花含笑
恨入西樓月斂眉驚瘦盡怨歸遲休將桐葉更題詩
不知橋下無情水流到天涯是幾時

洪咨夔

咨夔字舜俞號平齋於潛人嘉定二年進士累官
刑部尚書翰林學士知制誥加端明殿學士提舉
萬壽觀端平三年卒謚
忠文有平齋集詞一卷

眼兒媚

平沙芳草渡頭村綠遍去年痕游絲上下流鶯來往無
限銷魂綺窗深靜人歸晚金鴨水沉温海棠影下子

規聲裏立盡黃昏

詞旨警句海棠影下子規聲裏立盡黃昏

眼兒媚

平齋詞南鄉子德清舟中和韻云霜月冷娉婷
夾岸蘆花雪點成短艇水晶宮裏繫閒情誰道
芙蓉更有城阿鵲數歸程人倚低窗小畫屏莫
恨年華飛上鬢堪憑一度春風一度鶯

岳珂

珂字肅之號亦齋亦號倦翁相臺人忠武王孫敷
文閣待制霖子管內勸農使知嘉興歷官戶部侍
郎淮東總領兼制置使有玉楮集魏郊錄讀史備
忘東陞事畧程史籲天辨誣錄金陀粹編行世

滿江紅

小院深深悄鎮日陰晴無據春未足閨愁難寄琴心誰

與曲徑穿花尋蛺蝶虛闌傍日教鸚鵡笑十三楊柳女
兒腰東風舞雲外月風前絮情與恨長如許想綺窗
今夜與誰凝竚洛浦夢回留珮客秦樓聲斷吹簫侶正
黃昏時候杏花寒廉纖雨

生查子

芙蓉清夜游楊柳黃昏約小院碧苔深潤透雙鴛薄
暖玉慣春嬌簌簌花鈿落缺月故窺人影轉闌干角

京口三山志岳珂登多景樓祝英臺近云甕城
高盤徑近十里笋輿穩欲駕還休風雨苦無準
古來多少英雄平沙遺恨又總被長江流盡倩
誰問因甚衣帶中分吾家自畦畛落日潮頭慢

寫屬鏤憤斷腸煙樹揚州與亾休論正愁盡河山雙鬢

張 鎡

鎡字功甫號約齋西秦人循王諸孫居臨安官奉議郎有玉照堂詞一卷

念奴嬌 宜雨亭咏
千葉海棠

綠雲影裏把明霞織就千里文繡紫膩紅嬌扶不起好
是未開時候半怯春寒半便晴色養得胭脂透小亭人
靜嫩鶯啼破春晝 猶記攜手芳陰一枝斜戴嬌艷波
雙秀小語輕憐花總見爭得似花長久醉淺休歸夜深
同睡明日還相守免教春去斷腸空歎詩瘦

武林舊事云張約齋桂隱百果在南湖有玉照堂
梅花四百株蒼寒堂青柏二百株艷香館禩春花
百餘株碧宇修竹十畝藥珠洞茶蘼二十五株綠
畫軒木犀臨砌書葉軒柿二十株餐霞軒櫻桃三
十餘株宜雨亭海棠二十株夾流水滿霜亭橘五
十餘株

昭君怨 園池
夜泛

月在碧虛中住人向亂荷中去花氣雜風涼滿船香
雲被歌聲搖動酒被詩情掇送醉裏卧花心擁紅衾

玉照堂詞咏菱鵲橋仙云連汀接渚縈蒲帶蓼
萬葉香浮光滿濕煙吹霽木蘭輕照波底紅嬌
翠婉玉纖採來銀籠携去一曲山長水遠綵鴛
雙慣貼人飛恨南浦離多夢短

盧祖臯

祖臯字申之號蒲江永嘉人慶元中登進士第爲軍器少監嘉定十四年權直學士院有蒲江詞一卷

黃叔暘云蒲江樓攻媿之甥趙紫芝翁靈舒之詩友樂章甚工字字可入律呂東嘉姓譜盧申之嘉定中以軍器少監直北門屬時慶澤孔殷綸言沓布臯抒思泉湧號爲稱職俄卒于官工樂府江浙間多歌之

宴清都

初春

春訊飛瓊管風日薄度墻啼鳥聲亂江城次第笙歌翠合綺羅香暖溶溶澗綠冰泮醉夢裏年華暗換料黛眉重鎖隋隄芳心暗動梁苑新來雁濶雲音鸞分鏡影無計重見啼春細雨籠愁淡月恁時庭院離腸未語先

斷算猶有憑高望眼更那堪芳草連天飛梅弄晚

江城子

畫樓簾幙捲新晴掩銀屏曉寒輕墜粉飄香日日喚愁生暗數十年湖上路能幾度著娉婷年華空自感飄零擁春醒對誰醒天濶雲閒無處覓簫聲載酒買花年少事渾不似舊心情

賀新涼

彭傳師于吳江三高堂之前作釣雪亭蓋擅漁人之窟宅以供詩境也子野命予賦之

挽住風前柳問鴟夷當日扁舟近曾來否月落潮生無

限事零亂茶煙未久謾留得蓴鱸依舊可是從來功名
誤撫荒祠誰繼風流後今古恨一搔首 江涵雁影梅
花瘦四無塵雪飛風起夜窻如晝萬里乾坤清絕處付
與漁翁釣叟又恰是題詩時候猛拍闌干呼鷗鷺道他
年我亦垂綸手飛過我共樽酒

程史云彭傳師名法以恩科得官依錢東岩之門
督府嘗欲舉以使金不克遣終老于選調云
中吳紀聞云越上將軍范蠡江東步兵張翰贈右
補闕陸龜蒙各有畫像在吳江鱸鄉亭旁東坡嘗
有吳江三賢畫像詩後易其名曰三高且更為塑
像臞菴主人王文孺獻其地雪灘因遷之今在長
橋之北與垂虹亭相望石湖居士為之記
吳郡志云三高祠在吳江縣垂虹橋北即王氏臞

菴之雪灘也昔堂在垂虹南地極偏仄乾道三年
縣令趙伯虞徙之雪灘又云臞菴在松江之濱邑
人王份有超俗趣營此以居圍江湖以入圃故多
柳塘花嶼景物秀野名聞一時名勝喜游之皆為
題詩圃中有與閑平遠種德及煙雨觀橫秋閣凌
風臺鬱峩城釣雪灘琉璃沼臞翁澗竹廳龜巢雲
關瀨林楓林等處而浮天閣為第一總謂之臞菴
份字文孺以特恩補官嘗為大台令歸老焉
嘉靖吳江縣志釣雪亭在雪灘宋嘉泰二年縣尉
彭法建華亭林至記

倦尋芳春思

香泥壘燕密葉巢鶯春晴寒淺花徑風柔著地舞茵紅
軟鬪草煙欺羅袂薄鞦韆影落春遊倦醉歸來記寶帳
歌慵錦屏春暖 別來悵光陰容易還又茶蘼牡丹開

系如女言卷一
三
遍妬恨跡狂那更柳花盈面鴻羽難憑芳信短長安猶
近歸期遠倚危樓但鎮日繡簾高捲

清平樂

錦屏開曉寒入宮羅峭脉脉不知春又老簾外舞紅多
少舊時駐馬香階如今細雨蒼苔殘夢不成重理一
雙蝴蝶飛來

又

柳邊深院燕語明如剪消息無憑聽又懶隔斷畫屏雙
扇寶杯金縷紅牙醉魂幾度兒家何處一春游蕩夢

中猶恨楊花

謁金門

香漠漠低捲水風池閣玉腕籠紗金半約睡濃團扇落
雨過涼生雲薄女伴棹歌聲樂采得雙蓮迎笑剝柳
陰多處泊

又

風不定移去移來簾影一雨池塘新綠淨杏梁歸燕並
翠袖玉屏金鏡薄日綺疏人靜心事一春疑酒病鳥
啼花滿徑

烏夜啼

幾曲微風按柳生香暖日蒸花鴛鴦睡足方塘晚新綠
小窗紗尺素難將情緒嫩羅還試年華憑高無處尋
殘夢春思入琵琶

又西
湖

漾暖紋波颭颭吹晴絲雨濛濛輕衫短帽西湖路花氣
撲青驄鬪草褰衣濕翠鞦韆瞥眼飛紅日長不放春
醪困立盡海棠風

張履信

履信字思順號遊初鄱陽人侍郎南仲之孫嘗監
江口鎮官至連江守

柳梢青

雨歇桃繁風微柳靜日淡湖灣寒食清明雖然過了未
覺春閑行雲掩映春山真水墨山陰道間燕語侵愁
花飛撩恨人在江南

謁金門

春睡起小閣明窻兒底簾外雨聲花積水薄寒猶在裏
欲起還慵未起好是孤眠滋味一曲廣陵應忘記起
來調綠綺

周文璞

文璞字晉仙號方泉又號野齋又號山楹陽穀人有方泉先生集二卷子伯敬能詩

一剪梅

風韵蕭疎玉一團更著梅花輕裊雲鬟這回不是戀江南
只為溫柔天上人間 賦罷閑情共倚闌江月庭蕪
總是銷魂流蘓斜掩燭花寒一樣眉尖兩處關山

張伯雨貞居詞云周晉仙浪淘沙云還了酒家錢便好安眠大槐宮裏著貂蟬行到江南知是夢雪壓漁船盤礴古梅邊也是前緣鶯黃雪白又醒然一事最奇君聽取明日新年晉仙宋南渡來名士一號方泉老人此詞鮮于困學每愛書之百年後方外士張伯雨追和一章以為咲

樂惜困學公不能為我賞音挑下杖頭錢取次高眠玉梅金縷孟家蟬說著錢塘都是夢嬾問游船誰信酒壚邊別有仙緣自家天地一陶然醉寫桃符都不記明日新年

徐照

照字道輝又字靈暉號山民永嘉人與徐璣翁卷趙師秀號永嘉四靈詩皆工晚唐體有山民集

南歌子

簾景篔簹金線爐煙裊翠絲菰芽新出滿盆池
喚取玉瓶添水買魚兒 意取釵重碧慵梳髻翅垂相思無處說
相思笑把畫羅小扇覓春詞

清平樂

綠圍紅繞一枕屏山曉怪得今朝偏起早笑道牡丹開
了迎人捲上珠簾小螺未拂眉尖貪教玉籠鸚鵡楊
花飛滿妝奩

阮郎歸

綠楊庭戶靜沉沉楊花吹滿襟晚來閒向水邊尋驚飛
雙浴禽 分別後重登臨暮寒天氣陰妾心移得在君
心方知人恨深

詞旨警句相思無處說相思笑把畫羅小扇覓春
詞南歌子妾心移得在君心方知人恨深阮郎歸

俞灝

灝字商卿世居杭紹興四年進士開禧議開邊政
府密引灝畫計灝言輕脫寡謀之人不可信趙良
嗣張覺往轍可鑒歷秉麾節皆有聲寶慶二年致
仕築室九里松自號青松居士有青松居士集

點絳脣

欲問東君為誰重到江頭路斷橋薄暮香透溪雲渡
細草平沙愁入凌波步今何許怨春無語片片隨流水

潘枋

枋字庭堅號紫巖閩人端平二年進士廷對第三
人歷太學正通判潭州有紫巖集

南鄉子

生怕倚闌干閣下溪聲閣外山空有舊時山共水依然

暮雨朝雲去不還 相見躡飛鸞月下時時認佩環
月又漸低霜又下更闌折得梅花獨自看

劉後村詩話題云鐔津懷舊花菴絕妙詞選題云
題南劔州妓館

劉後村詩話延平樂籍中有能墨竹草聖者潘
廷堅爲賦念奴嬌美其書畫末云玉帶懸魚黃
金鑄印侯封萬戶待從頭繳納君王覓取愛卿
歸去余罷袁守歸塗赴郡集席間借觀今不復
有此雋
人矣

吳中舊事潘庭堅羽仙歌云雕簷綺戶倚晴空
如畫曾是吳王舊臺榭自浣紗去後落日平蕪
行雲斷幾見花開花謝淒涼闌干外一簇江山
多少圖王共爭霸莫閑愁金杯潑灩對酒當歌
歡娛地夢中與亾休話漸倚遍西風晚潮生明
月裡鷺鷥背人飛下

劉翰

翰字武子長沙人吳雲壑居父之客有小山集一
卷

好事近

花底一聲鶯花上半鉤斜月月落烏啼何處點飛英如
雪 東風吹盡去年愁解放了香結驚動小亭紅雨舞
雙雙金蝶

蝶戀花

團扇題詩春又晚小夢驚殘碧草池塘滿一曲銀鉤簾
半捲綠窗睡足鶯聲軟 瘦損衣圍羅帶減前度風流

絕妙好詞箋卷一
三
徒覺心情嬾誰品新腔拈翠管畫樓吹徹江南怨

清平樂

淒淒芳草怨得王孫老瘦損腰圍羅帶小長是錦書來
少玉簫吹落梅花曉烟猶透輕紗驚起半簾幽夢小
窻淡月啼鴉

詞旨警句驚起半簾幽夢
小窻淡月啼鴉清平樂

劉子寰

子寰字圻父號篁嶸建陽人居麻沙早登朱子之門劉後邨序其詩行世

霜天曉角

橫陰漠漠似覺羅衣薄正是海棠時候紗窻外東風惡
惜春春寂寞尋花花冷落不會這些情味元不是念

離索

古今詞話圻父咏山泉詞云靜坐時看松鼠飲
醉眠不碍山禽浴是真得山泉之趣者

張良臣俗本作景臣誤

良臣字武子號雪窻大梁人避地來鄞因家焉隆
興元年試南省魏文節公杞時爲參詳官携其三
策見知舉張燾曰此文拙古必故人張武子所爲
及撤棘果良臣也官止監左藏庫有集十卷刻於
廣信郡

西江月

四壁空圍恨玉十香淺捻啼綃殷雲度雨井桐凋雁雁
無書又到 別後釵分燕尾病餘鏡減鸞腰蠻江荳蔻
影連梢不道參橫易曉

樓鑰攻媿集書張武子詩後云與武子評詩謂
當有悟入處非積學所能到也君讀之以為得
我意又嘗自哦其詩曰客向愁中都老盡祇留
平楚伴銷凝又哦其詞云昨日豆花籬下過忽
然迎面好風吹獨自立多時其大約可見矣閉
門讀書室中無一物性嗜詩未嘗強作或終歲
無一語故所作必絕人妻孥至不免飢寒或謂
君不為歲晚計君曰水禽有名信天公者食魚
而不能捕凝立沙上俟它禽過偶墜魚于前乃
拾之然未聞有餓死者其夷澹類此

錢唐汪 沆

陳 皋同校勘

絕妙好詞箋卷一終

絕妙好詞箋卷二

弁陽老人周密原輯

宛平查為仁同箋

錢唐厲鶚

姜夔

夔字堯章鄱陽人蕭東夫愛其詞妻以兄子因寓居吳興之武康與白石洞天為鄰自號白石道人又號石帚慶元中曾上書乞正太常雅樂得免解訖不第有白石詩一卷詞五卷又有絳帖平續書譜大樂議張循王遺事集古印譜黃叔暘云白石詞極精妙不減清真其高處有美成所不能及沈伯時云姜白石清勁知音未免有生硬處張叔夏云詞要清空不要質實姜白石如野雲孤飛去留無迹

暗香

舊時月色算幾番照我梅邊吹笛喚起玉人不管清寒
與攀摘何遜而今漸老都忘却春風詞筆但怪得竹外
疎花香冷入瑤席 江國正寂寂歎寄與路遙夜雪初
積翠樽易竭紅萼無言耿相憶長記曾携手處千樹壓
西湖寒碧又片片吹盡也幾時見得

硯北雜志小紅范成大青衣也有色蕪成大請老
姜夔詣之一日授簡徵新聲夔製暗香疎影兩曲
成大使二妓習之音節清婉成大尋以小紅贈之
其夕大雪過垂虹賦詩曰自喜新詞韻最嬌小紅
低唱我吹簫曲終過盡松
陵路回首煙波十四橋

疎影 仲呂宮

苔枝綴玉有翠禽小小枝上同宿客裏相逢籬角黃昏
無言自倚修竹昭君不慣吳沙遠但暗憶江南江北想
珮環月下歸來化作此花幽獨 猶記深宮舊事那人
正睡裏飛近蛾綠莫似春風不管盈盈蚤與安排金屋
還教一片隨波去又却怨玉龍哀曲等恁時重覓幽香
已入小窻橫幅

白石道人歌曲題云辛亥之冬予載雪詣石湖止
既月授簡索句且徵新聲作此兩曲石湖把玩不
已使妓肄習之音節諧婉乃命之曰暗香疎影
張叔夏云白石暗香疎影二曲前無古人後無來

者自立新意真爲絕唱踈影前段用少陵詩後段用壽陽事此皆用事不爲事使

楊廉夫東維子集云元松陵陸子敬居分湖之北壘石爲山樹梅成林取姜白石詞語名其軒曰舊

時月色

揚州慢

仲呂宮

淮左名都竹西佳處解鞍少駐初程過春風十里盡薺
麥青青白胡馬窺江去後廢池喬木猶厭言兵漸黃昏
清角吹寒都在空城 杜郎俊賞算而今重到須驚縱
荳蔻詞工青樓夢好難賦深情二十四橋仍在波心蕩
冷月無聲念橋邊紅藥年年知爲誰生

白石道人歌曲題云淳熙丙申至日予過維揚夜雪初霽薺麥彌望入其城則四顧蕭條寒水自碧暮色漸起戍角悲吟予懷愴然感慨今昔因自度此曲干巖老人以爲有黍離之感也

玲瓏四犯

黃鍾商

疊鼓夜寒垂燈春淺恩恩時事如許倦遊歡意少俛仰
悲今古江淹又吟恨賦記當時送君南浦萬里乾坤百
年身世惟有此情苦 揚州柳垂官路有輕盈換馬端
正窺戶酒醒明月下夢逐潮聲去文章信美知何用謾
贏得天涯羈旅教說與春來要尋花伴侶

白石道人歌曲題云越中聞簫鼓感懷

琵琶仙吳興春遊

雙槩來時有人似舊曲桃根桃葉歌扇輕約飛花蛾眉
正竒絕春漸遠汀洲自綠更添了幾聲啼鳩十里揚州
三生杜牧前事休說 又還是宮燭分煙奈愁裏恩恩
換時節却把一襟芳思與空階榆莢千萬縷藏鴉細柳
爲玉樽起舞回雪想見西出陽關故人初別

白石道人歌曲題云吳都賦戶藏煙浦家具畫船
惟吳興爲然春遊之盛西湖未能過也已酉歲予
與蕭時甫載酒南遊因遇成歌
張叔夏云情景交鍊得言外意又云白石踈影暗
香揚州慢一萼紅琵琶仙淡黃柳等曲不惟清虛
且又騷雅讀之使人神觀飛越

法曲獻仙音

張彥功官舍

虛閣籠寒小簾通月暮色偏憐高處樹隔離宮水平馳
道湖山盡入樽俎奈楚客淹留久砧聲帶愁去 屢回
顧過秋風未成歸計誰念我重見冷楓紅舞喚起淡妝
人問逋仙今在何許象筆鸞牋甚如今不道秀句怕平
生幽恨化作沙邊煙雨

白石道人歌曲題云張彥功官舍在鐵冶嶺上卽
昔之教坊使宅高齋下瞰湖山光景竒絕予數過
之爲賦此

念奴嬌吳興荷花

開紅一舸記來時長與鴛鴦為侶三十六陂人未到水
 佩風裳無數翠葉吹涼玉容消酒更洒菰蒲雨嫣然搖
 動冷香飛上詩句 日暮青蓋亭亭情人不見爭忍凌
 波去只恐舞衣寒易落愁入西風南浦高柳垂陰老魚
 吹浪留我花間住田田多少幾回沙際歸路

白石道人歌曲題云予客武陵湖北憲治在焉古
 城野水喬木參天予與二三友日蕩舟其間意象
 幽閑不類人境秋水且涸荷葉出地尋丈因列坐
 其下上不見日清風徐來綠雲自動間於踈處窺
 見游人畫船亦一樂也榻來吳興數得相羊荷花
 中又夜汎西湖光影竒絕故以此句寫之

一萼紅 人日登
 定王臺

古城陰有官梅幾許紅萼未宜簪池面冰膠墻腰雪老
 雲意還又沉沉翠藤共閑穿徑竹漸笑語驚起卧沙禽
 野老林泉故王臺榭呼喚登臨 南去北來何事蕩湘
 雲楚水極目傷心朱戶黏雞金盤簇燕空歎時序侵尋
 記曾共西樓雅集想垂柳還裊萬絲金待得歸鞭到時
 只怕春深

白石道人歌曲題云丙午人日余客長沙別駕之
 觀政堂堂下曲沼西負古垣有盧橘幽篁一徑深
 曲穿徑而南官梅數十株如椒如菽或紅破白露
 枝影扶踈著屐蒼苔細石間野興橫生亟命駕登
 定王臺亂湘流入麓山湘雲低昂湘波容與興盡
 悲來醉吟成調

方輿勝覽云定王臺在潭州俗傳漢長沙定王載
米博長安土築臺於此以望其母唐姬張安國名
曰定王臺
自爲書扁

齊天樂

蟋蟀

庾郎先自吟愁賦淒淒更聞私語露濕銅鋪苔侵石井
都是曾聽伊處哀音似訴正思婦無眠起尋機杼曲曲
屏山夜涼獨自甚情緒西窗又吹暗雨爲誰頻斷續
相和砧杵候館迎秋離宮弔月別有傷心無數幽詩漫
與笑籬落呼燈世間兒女寫入琴絲一聲聲更苦

白石道人歌曲題云丙辰歲與張功父會飲張達
可之堂聞屋壁間蟋蟀有聲功父約予同賦以授

歌者功父先成詞甚美予表回末利花間仰見秋
月頓起幽思尋亦得此蟋蟀中都呼爲促織善鬪
好事者或以二三十萬錢致一枚鏤象齒爲樓觀
以貯之又自注云宣政間有士大夫製蟋蟀吟
張叔夏云全章皆精粹所咏瞭然在目且不留滯
於物

淡黃柳

客舍肥

空城曉角吹入垂楊陌馬上單衣寒惻惻看盡鶯黃嫩
綠都是江南舊相識正岑寂明朝又寒食強携酒小
橋宅怕梨花落盡成秋色燕燕飛來問春何在惟有池
塘自碧

小重山

湘梅

人繞湘臯月墜時斜橫花自小浸愁漪一春幽事有誰
知東風冷香遠茜裙歸鷗去昔遊非遙憐花可可夢
依依九疑雲杳斷魂啼相思血都沁綠筠枝

樓鑰攻媿集云潘端叔惠紅梅一本全體皆江梅也香亦如之但色紅爾來自湖湘非他種比自此當稱為紅江梅以別之王文公蘓文忠石曼卿諸公有紅梅詩意其皆未見此種也

點絳脣

松江

燕雁無心太湖西畔隨雲去數峰清苦商畧黃昏雨

第四橋邊擬共天隨住今何許凭闌懷古殘柳參差舞

白石道人歌曲題云丁未冬過吳江作吳郡志云松江在郡南四十五里禹貢三江之一

也南與太湖接吳江縣在江濱垂虹跨其上天下絕景也

惜紅衣

吳興荷花無射宮

枕簟邀涼琴書換日睡餘無力細灑冰泉并刀破甘碧
墻頭喚酒誰問訊城南詩客岑寂高柳晚蟬說西風消
息虹梁水陌魚浪吹香紅衣半狼籍維舟試望故國
渺天北可惜柳邊沙外不共美人游歷問甚時同賦三

十六陂秋色

白石道人歌曲題云吳興號水晶宮荷花盛麗陳簡齋云今年何以報君恩一路荷花相送到青墩亦可見矣丁未之夏余游千巖數往來紅香中自度此曲以無射宮歌之

詞旨屬對虛閣籠寒小簾通月池面冰膠墻腰雪
老翠葉吹涼玉容銷酒

警句千樹壓西湖寒碧暗香波心蕩冷月無聲揚
州慢墻頭喚酒誰問訊城南詩客岑寂高柳晚蟬

說西風消息惜紅衣問甚時重賦三十六陂秋色
念奴嬌

劉後村詩話姜堯章有平聲滿江紅自叙云滿
江紅舊詞用仄韻多不協律如無心撲歌者將

心字融入去聲方諧音律予欲以平韻為之久
不能成因汎巢湖祝日得一夕風當以平韻滿

江紅為神姥壽言訖風與帆俱駛頃刻而成末
句聞珮環則協律矣其詞云仙姥來時正一望

千頃翠瀾旌旗與亂雲俱下依約前山命駕羣
龍金作輓相從諸娣玉為冠廟中列坐如夫人

者十五人向夜深風定悄無人聞珮環神奇處
君試看奠淮右阻江南遣六丁雷電別守東關

應咲英雄無好手一篙春水走曹瞞又怎知人
在小紅樓簾影間此闕甚佳惜無人能歌之者

澄懷錄云姜堯章云余別石湖歸吳興雪後過
垂虹賦詩云笠澤茫茫雁影微玉峯重疊護雲

衣長橋寂寞春寒夜只有詩人一舸歸後五年
冬復與俞商卿張平甫銛朴翁自封禺同載詣

梁溪道經吳淞山寒天迥雲浪四合中夕相呼
步垂虹星斗下垂錯雜漁火朔風凜凜卮酒不

能支朴翁以衾自纏猶相與行吟因賦慶宮春
云雙槳蕩波一簑松雨暮愁漸滿空濶呼我盟

鷗翩翩欲下背人還過木末那回歸去蕩雲雪
孤舟夜發傷心重見依約眉山黛痕低壓采香

徑裏春寒老子婆娑自歌誰答垂虹西望飄然
引去此興平生難過酒醒波遠正凝想明璫素

鞞如今安在唯有闌干伴人一霎
耆舊續聞姜堯章嘗寓吳興張仲遠家仲遠屢

出外其室人知書賓客通問必先窺來札性頗
妒堯章戲作百宜嬌以遺仲遠云看垂楊連苑

杜若吹沙愁損未歸眼信馬青樓去重簾下娉
婷人妙飛燕翠尊共欵聽艷歌郎意先感便携

手月地雲階裏愛良夜微煖無限風流踈散有
 暗藏弓履偷寄香翰明日聞津鼓湘江上催人
 還解春纜亂紅萬點悵斷魂煙水遙遠又爭似
 相携乘一舸鎮長見仲遠歸竟莫能辨則受其
 指瓜損面至不能出外云
 開慶四明續志吳潛暗香踈影二詞序云猶記
 已卯庚辰之間初識堯章于維揚至已丑嘉興
 再會自此契濶聞堯章死西湖嘗助諸丈為殯
 之今又不知幾年矣自昭忽錄示堯章暗香踈
 影二詞因信手酬酢并賡潘德久之詩云雪來
 比色對淡然一笑休喧笙笛莫怪廣平鐵石心
 腸為伊折偏是三花兩藥消萬古才人騷筆尚
 記得醉卧東園天幕地為席回首往事寂正雨
 暗霧昏萬種愁積錦江路悄媒聘音沉兩空憶
 終是茅簷竹戶難指望凌煙金碧憔悴了羌管
 裏怨誰始得右暗香佳人步玉待月來弄影天
 挂參宿冷透屏幃清入肌膚風敲又聽簷竹前
 村不管深雪閉猶自繞枝南枝北算平生此段

劉仙倫

仙倫一名儼字叔擬號招山廬陵人有招山小集
 一卷

江神子

幽竒占壓百花曾獨閑想羅浮舊恨有人正醉
 裏姝翠蛾綠夢斷魂驚幾許淒涼却是千林梅
 屋雞聲野渡溪橋滑又角引戍樓悲曲怎得知
 清足亭邊自在杖藜巾幅自注云梅聖俞詩云
 十分清意足余別墅有
 梅亭扁曰清足右疎影

東風吹夢落巫山整雲鬟却霜紈雪貌冰膚曾共控雙

鸞吹罷玉簫香霧溼殘月墜亂峰寒解璫回首憶前

歡見無緣恨無端憔悴蕭郎贏得帶圍寬紅葉不傳天

上信空流水到人間

菩薩蠻

效唐人
閨怨

吹簫人去行雲杳香篝繡被都閒了
疊損縷金衣伊家
渾不知
冷煙寒食夜淡月梨花下
猶有軟心腸爲他
燒夜香

蝶戀花

小立東風誰共語碧盡行雲依約蘭皋暮
誰問離懷知
幾許一溪流水和煙雨
媚蕩楊花無著處
纔伴春來
忙底隨春去只恐遊蜂粘得住
斜陽芳草江頭路

一剪梅

唱到陽關第四聲香帶輕分羅帶輕分
杏花時節雨紛
紛山繞孤村水繞孤村
更沒心情共酒樽
春衫香滿
空有啼痕一般離思兩銷魂
馬上黃昏樓上黃昏

霜天曉角

倚空絕壁直下江千尺天際兩蛾凝黛
愁與恨幾時極
暮潮風正急酒醒聞塞笛
試問謫仙何處
青山外遠
煙碧

方輿勝覽云天門山在當塗縣西南三十里又名
蛾眉山夾大江東曰博望西曰梁山蛾眉亭在采

石山上望見天門山壁間有詩日中分黛色三千
尺不著人間一點愁
詞旨警句一般離思兩銷魂馬上黃昏樓上黃昏
一剪梅

孫惟信

惟信字季蕃號花翁開封人在江湖頗有標致多
見前輩多聞舊事善雅談長短句尤工嘗有官棄
去不仕有花翁集一卷

沈伯時云孫花翁有好詞亦善運意但雅正中時
有一二市井語

晝錦堂

薄袖禁寒輕妝媚晚落梅庭院春妍映戶盈盈回倩笑
整花鈿柳裁雲剪腰支小鳳盤鴉聳髻鬟偏東風裏香

步翠搖藍橋那日因緣 嬋娟流慧眇渾當了恩恩密
愛深憐夢過欄杆猶認冷月鞦韆杏梢空鬧相思眼燕
翎難繫斷腸賤銀屏下爭信有人真個病也天天

夜合花

風葉敲窗露蛩吟甃謝娘庭院秋宵鳳屏半掩釵花映
燭紅搖潤玉暖膩雲嬌染芳情香透鮫綃斷魂留夢煙
迷楚驛月冷藍橋 誰念賣藥文簫望仙城路杳鶯燕
迢迢羅衫暗摺蘭痕粉迹都銷流水遠亂花飄苦相思
寬盡香腰幾時重恁玉驄過處小袖輕招

燭影搖紅牡丹

一朵鞦韆紅寶釵壓髻東風溜年時也是牡丹時相見花
邊酒初試夾紗半袖與花枝盈盈鬪秀對花臨景為景
牽情因花感舊 題葉無憑曲溝流水空回首夢雲不
到小山屏真個歡難偶別後知他安否軟紅街清明還
又絮飛春盡天遠書沉日長人瘦

醉思凡

吹簫跨鸞香銷夜闌杏花樓上春殘繡羅衾半閑 衣
寬帶寬千山萬山斷腸十二闌干更斜陽暮寒

南鄉子

璧月小紅樓聽得吹簫憶舊游霜冷闌干天似水揚州
薄倖聲名總是愁 塵暗鷓鴣裘裁剪曾勞玉指柔一
夢覺來三十載風流空對梅花白了頭

詞旨屬對薄袖禁寒輕妝媚晚
警句絮飛春盡天遠書沉日長人瘦燭影搖紅

劉後村孫花翁墓誌季蕃貫開封曾祖昇祖可
父頹武爵季蕃少受祖澤調監當不樂棄去始
婚於婺後去婺游留蕪杭最久一榻之外無長
物躬爨而食書無乞米之帖文無逐貧之賦終
其身如此名重江浙公卿間聞花翁至爭倒屣
所談非山水風月一不挂口長身縕袍意度踈
曠見者疑為俠客異人其倚聲度曲公瑾之妙
散髮橫笛野王之逸奮袖起舞越石之壯也

史達祖

達祖字邦卿號梅溪汴人有梅溪詞一卷四朝聞見錄韓侂胄為平章專倚省吏史達祖奉行文字擬帖擬旨俱出其手侍從柬札至用申呈韓敗遂黥焉

姜堯章云奇秀清逸有李長吉之韵蓋能融情景於一家會句意於兩得

張功甫云史生之作情詞俱到織綃泉底去塵眼中有瓌奇警邁清新閑婉之長而無詭蕩汗淫之失端可分鑣清

真平睨方回

綺羅香

春雨

做冷欺花將煙困柳千里偷催春暮盡日冥迷愁裡欲飛還住驚粉重蠅宿西園喜泥潤燕歸南浦最妨他佳

約風流鈿車不到杜陵路 沉沉江上望極還被春潮晚急難尋官渡隱約遙峯和淚謝娘眉嫵臨斷岸新綠生時是落紅帶愁流去記當日門掩梨花剪燈深夜語

雙雙燕

過春社了度簾幙中間去年塵冷差池欲往試入舊巢相並還相雕梁藻井又軟語商量不定飄然快拂花梢翠尾分開紅影 芳徑芹泥雨潤愛貼地爭飛競誇輕俊紅樓歸晚看足柳昏花暝應自棲香正穩便忘了天涯芳信愁損玉人日日畫欄獨凭

黃叔暘云形容盡矣又云姜堯章最賞其柳昏花暝之句

夜行船

不剪春衫愁意態過收燈有些寒在小雨空簾無人深巷已早杏花先賣白髮潘郎寬沈帶怕看山憶他眉黛草色拖裙煙光惹鬢常記故園挑菜

東風第一枝

春雪

巧剪蘭心偷粘草甲東風欲障新暖謾疑碧瓦難留信知暮寒較淺行天入鏡做弄出輕鬆纖軟料故園不捲重簾悞了乍來雙燕青未了柳回白眼紅不斷杏開

素面舊遊憶着山陰厚盟遂妨上苑寒爐重煖且慢放春衫針線恐鳳靴挑菜歸來萬一灞橋相見

黃叔暘云結句尤爲姜堯章拈出

又燈夕

酒館歌雲燈街舞繡笑聲喧似簫鼓太平京國多歡大酺綺羅幾處東風不動照花影一天春聚耀翠光金縷相交苒苒細吹香霧嗟醉玉少年丰度懷艷雪舊家伴侶閉門明月關心倚窗小梅索句吟情欲斷念嬌俊知人無據想袖寒珠絡藏香夜久帶愁歸去

黃鍾喜遷鶯元宵

月波凝滴望玉壺天近了無塵隔翠眼圈花冰絲織練
黃道寶光相直自憐詩酒瘦難應接許多春色最無賴
是隨香趁燭曾伴狂客蹤跡漫記憶老了杜郎忍聽
東風笛柳院燈踈梅廳雪在誰與細傾春碧舊情拘未
定猶自學當年游歷怕萬一悞玉人夜寒簾隙

張叔夏云不獨措詞精粹
又且見時節風物之感

清商怨

春愁遠春夢亂鳳釵一股輕塵滿江煙白江波碧柳戶

清明燕簾寒食憶憶鶯聲晚簫聲短落花不許春拘
管新相識休相失翠陌吹衣畫橋橫笛得得

蝶戀花

二月東風吹客袂蘓小門前楊柳如腰細蝴蝶識人遊
冶地舊曾來處花開未幾夜湖山生夢寐評泊尋芳
只怕春寒裏今歲清明逢一作連上巳相思先到湔裙水

玉樓春

社前一日

遊人等得春晴也處處旗亭閑繫馬雨前紅杏尙娉婷
風裏殘梅無顧藉忌拈針指還逢社鬪草羸多裙欲

黃鍾喜遷鶯元宵

月波凝滴望玉壺天近了無塵隔翠眼圈花冰絲織練
黃道寶光相直自憐詩酒瘦難應接許多春色最無賴
是隨香趁燭曾伴狂客蹤跡漫記憶老了杜郎忍聽
東風笛柳院燈踈梅廳雪在誰與細傾春碧舊情拘未
定猶自學當年游歷怕萬一悞玉人夜寒簾隙

張叔夏云不獨措詞精粹
又且見時節風物之感

清商怨

春愁遠春夢亂鳳釵一股輕塵滿江煙白江波碧柳戶

清明燕簾寒食憶憶鶯聲晚簫聲短落花不許春拘
管新相識休相失翠陌吹衣畫橋橫笛得得

蝶戀花

二月東風吹客袂蘓小門前楊柳如腰細蝴蝶識人遊
冶地舊曾來處花開未幾夜湖山生夢寐評泊尋芳
只怕春寒裏今歲清明逢一作連上巳相思先到湔裙水

玉樓春

社前一日

遊人等得春晴也處處旗亭閑繫馬雨前紅杏尙娉婷
風裏殘梅無顧藉忌拈針指還逢社鬪草羸多裙欲

卸明朝新燕定歸來叮囑重簾休放下

青玉案

蕙花老盡離騷句綠染徧江頭樹日暝酒消聽驟雨青
榆錢小碧苔錢古難買東君住官河不礙遺鞭路被
芳草將愁去多定紅樓簾影暮蘭燈初上夜香初炷猶

自聽鸚鵡

詞旨屬對斷浦沉雲空山挂雨畫裡移舟詩邊就
夢做冷欺花將煙困柳巧剪蘭心偷粘草甲
警句臨斷岸新綠生時是落紅帶愁流去記當日
門掩梨花剪燈深夜語綺羅香愁損玉人日日畫
闌獨凭雙雙燕恐鳳靴挑菜歸來萬一灞橋相見
東風第一枝自憐詩酒瘦難應接許多春色喜遷

鶯

詞眼柳昏花暝

梅溪詞水龍吟陪節欲行留別社友云道人越
布單衣興高愛學蘓門嘯有時也伴四佳公子
五陵年少歌裏眠香酒酣喝月壯懷無撓楚江
南每為神州未復闌干靜慵登眺今日征夫在
道敢辭勞風沙短帽休吟稷穗休尋喬木獨憐
遺老同社詩囊小窗針線斷腸秋早看歸來幾
許吳霜染鬢驗愁多少按梅溪曾陪使臣至金
故有此詞

高觀國竹屋癡語齊天樂中秋夜懷梅溪云晚
雲知有關山念澄霄卷開清霽素景中分冰盤
正溢何啻嬋娟千里危闌靜倚正玉筯吹涼翠
觴留醉記約清吟錦袍初喚醉覓起孤光天地
共影浩歌誰與舞淒涼風味古驛煙寒幽垣夢
冷應念秦樓十二歸心對此想斗插天南雁橫
遼水試問姮娥
有愁能為寄

高觀國

觀國字賓王山陰人有竹屋癡語一卷
陳唐卿云竹屋梅溪詞要是不經人道語其妙處
少游美成不及也
張叔夏云竹屋白石夢窻梅溪俱能特立清新之
意刪削靡曼之
詞自成一家

齊天樂

碧雲缺處無多雨愁與去帆俱遠倒葦沙閑枯蘭溼冷
寥落寒江秋晚樓陰縱覽正翳怯清吟病多依黯怕挹
西風袖羅香自去年減風流江左久客舊遊得意處
珠簾曾捲載酒春情吹簫夜約猶憶玉嬌春怨塵棲故

苑歎璧月空檐夢雲飛觀送絕征鴻楚峰煙數點

玉樓春

宮詞

幾雙海燕來金屋春滿離宮三十六春風剪草碧纖纖
春雨浥花紅撲撲衛姬鄭女腰如束齊唱陽關新製
曲曲終移宴起笙簫花下晚寒生翠縠

金人捧露盤

水仙

夢湘雲吟湘月弔湘靈有誰見羅鞵塵生凌波步弱背
人羞整六銖輕娉娉裊裊暈嬌黃玉色輕明香心靜
波心冷琴心怨客心驚怕佩解却返瑤京盃擎清露醉

春蘭友與梅兄暮煙萬頃斷腸是雪冷江清

又梅

念瑤姬翻瑤佩下瑤池冷香夢吹上南枝羅浮路杳憶
曾清晚見仙姿天寒翠袖可憐是倚竹依依 溪痕淺
雪痕凍月痕淡粉痕微江樓怨一笛休吹芳香待寄玉
堂煙驛雨淒迷新愁萬斛爲春瘦却怕春知

祝英臺近

一窗寒孤燼冷獨自箇春睡繡被薰香不是舊風味靜
聽滴滴簷聲驚愁攪夢更不管庾郎心碎 念芳意一

併十日春風梅花睩憔悴懶做新詞春在可憐裏幾時
挑菜踏青雲沉雨斷盡分付楚天之外

思佳客

剪翠衫兒穩四停最憐一曲鳳簫吟同心羅帕輕藏素
合字香囊半影金 春思悄畫窗深誰能拘束少年心
鶯來驚碎風流膽踏動櫻桃葉底鈴

霜天曉角

春雲粉色春水和雲溼試問西湖楊柳東風外幾絲碧
望極連翠陌蘭橈雙槳急欲訪莫愁何處旗亭在畫

橋側

風入松

捲簾日日恨春陰寒食新晴馬蹄只向南山去長橋愛
花柳多情紅外風嬌日暖翠邊水秀山明 杜郎歌酒
過平生到處蓬瀛醉竟不入重城晚穠歡寄桃葉桃根
繡被嫩寒清曉鶯啼喚起春醒

謁金門

煙墅暝隔斷仙源芳徑雨歇花梢竟未醒溼紅如有恨
別後香車誰整怪得畫橋春靜碧漲平湖三十頃歸

雲何處問

詞旨屬對倒葦沙閑枯蘭淑冷
警句愁萬斛爲春瘦却怕春知金人捧露盤驚愁
攪夢更不管庾郎心碎祝英臺近
詞眼玉嬌香怨

劉鎮

鎮字叔安南海人嘉泰二年進士學者稱爲隨如
先生有隨如百詠
劉潛夫云麗不至褻新不犯陳周柳辛陸之能庶
乎兼之

玉樓春

東山
探梅

泠泠水向橋東去漠漠雲歸溪上住踈風淡月有來時
流水行雲無覓處 佳人獨立相思苦薄袖欺寒修竹

暮白頭空負雪邊春著意問春春不語

隨如百詠丙戌清明和章質夫韵水龍吟云弄晴臺館收煙候時有燕泥香墜宿醒未解單衣初試騰騰春思前度桃花去年人面重門深閉記彩鸞別後青驄歸去長亭路芳塵起十二屏山遍倚任蒼苔點紅如綴黃昏人靜煖香吹月一簾花碎芳意婆娑綠陰風雨畫橋煙水笑多情司馬留春無計濕青衫淚

張輯

輯字宗瑞號東澤鄱陽人連江太守思順之子有東澤綺語債二卷朱湛盧公東澤得詩法於姜堯章世所傳欵乃集皆以為月下謫仙復作不知其又能詞也其詞皆以篇末之語立新名云

踈簾淡月

梧桐雨細漸滴作秋聲被風驚碎潤逼衣篝線裊蕙爐
沉水悠悠歲月天涯醉一分秋一分憔悴紫簫吹斷素
牋恨切夜寒鴻起 又何苦淒涼客裏負草堂春綠竹
溪空翠落葉西風吹老幾番塵世從前諳盡江湖味聽
商歌歸興千里露侵宿酒踈簾淡月照人無寐

山漸青

山無情水無情楊柳飛花春雨晴征衫長短亭 擬行
行重行行吟到江南第幾程江南山漸青

詞女如言卷二
三
謁金門

花半溼睡起一簾晴色千里江南真咫尺醉中歸夢直
前度蘭舟送客雙鯉沉沉消息樓外垂楊如此碧問
春來幾日

念奴嬌

嫩涼生曉怪得今朝湖上秋風無迹古寺桂香山色外
腸斷幽叢金碧驟雨俄來蒼煙不見苔徑孤唵屐繫船
高柳晚蟬嘶破愁寂且約携酒高歌與鷗相好分坐
漁磯石算只藕花知我意猶把紅芳留客樓閣空濛管
絃清潤一水盈盈隔不如休去月懸良夜千尺

祝英臺近

竹間棋池上字風日共清美誰道春深湘綠漲沙觜更
添楊柳無情恨煙顰雨却不把扁舟偷繫去千里明
日知幾重山後朝幾重水對酒相思爭似且留醉奈何
琴劍恩恩而今心事在月夜杜鵑聲裡

詞旨警句悠悠歲月天涯醉一分秋一分憔悴踈

簾淡月落葉西風吹老幾番塵世同上露侵宿酒

踈簾淡月照人無寐同上算只藕花知我意猶把

紅芳留客念奴嬌

詞眼恨煙顰雨

東澤綺語債馮可遷號予爲東仙故賦東仙寓

沁園春云東澤先生誰說能詩興到偶然但平生心事落花啼鳥多年盟好白石清泉家近宮亭眼中蘆阜九疊屏開雲錦邊出門去且掀髯大笑有釣魚船一絲風裡嬋娟愛月在滄浪上下天更叢書觀徧筆牀靜畫篷牕睡起茶竈踈煙黃鶴來遲丹砂成未何日風流葛稚川人間世聽江湖詩友號我東仙

李石

石字知幾號方舟資陽人乾道中進士以薦任太學博士出為成都倅仕至都官員外郎有方舟集

木蘭花令

輓轡軛門前井不道隔窻人睡醒柔絲無力玉琴寒
殘麝徹心金鴨冷一鶯啼破簾櫳靜紅日漸高花轉

影起來情緒寄游絲飛絆翠翹風不定

花草粹編李知幾臨江仙云煙柳踈踈人悄悄畫樓風外吹笙倚闌聞喚小紅聲熏香臨欲睡玉漏已三更坐待不來來又去一方明月中庭粉墻東畔小橋橫起來花影下扇子撲流螢

李泳

泳字子永號蘭澤廬陵人嘗為溧水令與兄洪子大漳子清弟浙子秀注子召著李氏華萼集五卷姪倫為序

定風波

點點行人趁落暉搖搖煙艇出漁扉一路水香流不斷
零亂春潮綠浸野薔薇南去北來愁幾許登臨懷古

欲沾衣試問越王歌舞地佳麗只今惟有鷓鴣啼

清平樂

亂雲將雨飛過鴛鴦浦人在小樓空翠處分得一襟離
緒片帆隱隱歸舟天邊雪捲雲游今夜夢竟何處青
山不隔人愁

夷堅志大江富池縣有甘寧將軍廟殿宇雄偉
行舟過之者必具牲醴祇謁李子永嘗自西下
舟次散花洲有神鴉飛立檣竿久之東去即遇
便風晡時抵岸步青蛇激箭而來至舟尾不見
是夕艤泊明日賽神其前大樓七間尤壯偉郡
守周少隱采東坡祠語扁為卷雪子永作詩曰
卷雪樓前萬里江亂峯卓立森旗槍上有甘公
古祠宇節制洪流掌風雨甘公一去踰千年至

今忠氣猶凜然我來再拜攬陳迹斜陽白鳥橫
蒼煙初題梁間時本云英威凜然如有人掣其
肘乃改為忠氣又賦望月水調歌頭云危樓雲
雨上其下水扶天群山四合飛動寒翠落簷前
盡是秋清闌檻一咲波翻濤怒雪陣卷蒼煙炎
暑去無跡清駛久翩翩夜將闌人欲靜月初圓
素娥弄影光射空際綠嬋娟不用濯纓垂釣喚
取龍公仙駕耕此萬瓊田橫笛望中起吾意已
超然及旦移舟神鴉青
蛇送至長風沙而止

鄭域俗本作陸域誤

域字中卿號松窗三山人慶元丙辰隨張貴謨使
金有燕谷剽聞二卷記北庭甚詳

昭君怨梅

道是花來春未道是雪來香異水外一枝斜野人家

冷落竹籬茅舍富貴玉堂瓊榭兩地不同栽一般開

王 嶠

嶠字季夷號貴英陳氏書錄解題季夷北海人紹
淳間名士寓居吳興陸務觀與之厚善三子甲田
申皆登科
有北海集

祝英臺近

柳煙濃花露重合是醉時候樓倚花梢長記小垂手誰
教釵燕輕分鏡鸞慵舞是孤負幾番晴晝 自別後聞
道花底花前多是兩眉皺又說新來比似舊時瘦須知
兩意常存相逢終有莫謾被春光僝僽

夜行船

曲水濺裙三月二馬如龍鈿車如水風颺游絲日烘晴
晝人共海棠俱醉 客裏光陰難可意掃芳塵舊遊誰
寄午夢醒來不覺小窻人靜春在賣花聲裏

詞旨警句春在賣
花聲裏夜行船

蔡松年

松年字伯堅從父靖除真定府判官遂爲真定人
仕金官至尙書右丞相封衛國公自號蕭閒老人
卒謚文簡工樂府與吳彥高齊
名號吳蔡體有蕭閒公集六卷

鷓鴣天

賞荷

秀樾橫塘十里香水光晚色靜年芳燕支膚瘦薰沉水

翡翠盤高走夜光 山黛遠月波長暮雲秋影照瀟湘

醉覓應逐凌波夢分付西風此夜涼

王若虛滹南集詩話云蕭間樂善堂賞荷詞胭脂膚瘦薰沉水翡翠盤高走夜光世多稱之此句誠

佳然蓮體實肥不宜言瘦予友彭子升嘗易賦字此似差勝

尉遲盃

紫雲暖恨翠雛珠樹雙棲晚小花靜院逢迎的的風流
心眼紅潮照玉椀午香重草綠宮羅淡喜銀屏小語私
分麝月春心一點 華年共有好願何時定妝鬟莫雨

零亂夢似花飛人歸月冷一夜曉山新怨劉郎興尋常
不淺况不似桃花春溪遠覺情隨曉馬東風病酒餘香
相半

歸潛志云蔡丞相伯堅嘗奉使高麗為館妓賦石州慢云雲海蓬萊風霧鬢不假梳掠仙衣

卷盡霓裳方見宮腰纖弱心期得處世間言語非真海犀一點通寥廓無物比情濃與無情相

博離索曉來一枕餘香酒病賴花醫却瀲灩金尊收拾新愁重酌半帆雲影載得無限關山夢

覓應被梅花覺梅子雨絲絲滿江干樓閣高麗故事上國使來館中有侍妓蔡之仙衣卷盡霓

裳方見宮腰纖弱不免為人疵議之矣滹南詩話蕭閑云風頭夢雨吹無跡蓋雨之至

細者若有若無謂之夢田夫野婦皆道之賀方回有風頭夢雨吹成雪之句又云蕭閑憶恒陽

家山云好在斜川三尺玉公宅前有池可三畝
號小斜川又自鎮陽還兵府贈離筵乞言者云
待人間覓箇無情心緒著多情換此篇有恨別
之意故以情爲苦而還羨無情終章言之宜矣
中州樂府蔡松年聲聲慢涼陞寄內云青蕪平
野小雨千峯還成暮陞寒色裁剪芸窗憶得伴
人良夕遙憐幾重眉黛恨相逢少於行役梨花
淚正宮衣春瘦曉紅無力應怪浮雲夫婿不解
趁新醅醉眠涼月怨入關山西去又傳消息誰
知倦游心事向年來苦思泉石人未老約閭峯
多占秀碧

韓 嘜

嘜字子耕號蕭閑文獻通考韓嘜有蕭閒詞一卷

高陽臺

除夕

頻聽銀籤重燃絳蠟年華袞袞驚心餞舊迎新能消幾
刻光陰老來可慣通宵飲待不眠還怕寒侵掩清尊多
謝梅花伴我微吟 隣娃已試春妝了更蜂枝簇翠燕
股橫金勾引春風也知芳意難禁朱顏那有年年好逞
豔游羸取如今恣登臨殘雪樓臺遲日園林

浪淘沙

莫上玉樓看花雨斑斑四垂羅幙護朝寒燕子不知春
去也飛認欄杆 回首幾關山後會應難相逢祇有夢
寬間可奈夢隨春漏短不到江南

又豐樂樓

裙色草初青
鴨鴨波輕
試花霏雨溼
春晴三十六
梯人不到
獨喚瑤箏
艇子憶逢
迎依舊多情
朱門只合鎖
娉婷却逐彩鸞
歸去路香陌
春城

武林舊事云豐樂樓在湧金門外舊為眾樂亭又改聳翠樓政和中改今名淳祐間趙京尹與憲重建宏麗為湖山冠又甃月池立秋千梭門植花木構數亭春時遊人繁盛舊為酒肆後以學館致爭但為朝紳同年會拜鄉會之地吳夢窻嘗大書所作鶯啼序於壁一時為人傳誦詞旨警句試花霏雨濕春晴浪淘沙

錢唐汪 沆

陳 皋同校勘

絕妙好詞箋卷二終

絕妙好詞箋卷三

弁陽老人周密原輯

宛平查為仁

同箋

錢唐厲鶚

鶚

劉克莊

克莊字潛夫號後邨莆田人以蔭仕淳祐中賜同進士出身官至龍圖閣直學士有後村別調一卷

摸魚兒

海棠

甚春來冷煙淒雨朝朝遲了芳信
驀然作暖晴三日又
覺萬姝嬌困天怎忍潘令老不成也
沒看花分才情減
盡悵玉局飛仙石湖絕筆辜負這風韻
傾城色懊惱

佳人薄命墻頭岑寂誰問東風日莫無聊賴吹得燕支
成粉君細認花共酒古來二事天尤吝年光去迅漫綠
葉成陰青苔滿地做取異時恨

卜算子

海棠為風
雨所損

片片蝶衣輕點點猩紅小道是天工不惜花百種千般
巧朝見樹頭繁莫見枝頭少道是天工果惜花雨洗
風吹了

清平樂

頃在維揚陳師文參議
家舞姬絕妙為賦此

宮腰束素只怕能輕舉好築避風臺護取莫遣驚鴻飛

去一團香玉溫柔笑顰俱有風流貪與蕭郎眉語不
知舞錯伊州

生查子

燈夕戲
陳敬叟

繁燈奪霽華戲鼓侵明滅物色舊時同情味中年別
淺畫鏡中眉深拜樓中月人散市聲收漸入愁時節

花菴絕妙詞選云陳以莊名敬叟號月溪建安人
劉後村陳敬叟集序云敬叟詩才氣清拔力量宏
放為人曠達如列禦寇莊周飲酒如阮嗣宗李太
白筆札如谷子雲草隸如張顛李潮樂府如温飛
卿韓致光余每歎其所長非復一事為穀城黃子
厚之甥故其詩酷似云
詞旨警句貪與蕭郎眉語不知舞錯伊州清平樂
瀛奎律髓注寶慶初史彌遠廢立之際錢唐書

肆陳起宗之能詩凡江湖詩人俱與之善刊江湖集以售劉潛夫南岳藁與焉宗之賦詩有云秋雨梧桐皇子府春風楊柳相公橋本改劉屏山句也或嫁秋雨春風之句為敖器之所作言者併梅詩論列劈江湖集板二人皆坐罪初彌遠議下大理逮治鄭丞相清之在瑣闥白彌遠中輟而宗之坐流配於是詔禁士大夫作詩如孫花翁之徒改業為長短句紹定癸巳彌遠死詩禁解潛夫為訪梅絕句云夢得因桃却左遷長源為柳忤當權幸然不識桃并李也被梅花累十年此可備梅花大公案也

吳潛

潛字毅夫號履齋寧國人嘉定十年進士第一淳祐中觀文殿大學士封慶國公改封許國公景定初安置循州卒贈少師有履齋詩餘三卷

滿江紅

金陵烏衣園

柳帶榆錢又還過清明寒食天一笑滿園羅綺滿城簫
笛花樹得晴紅欲染遠山過雨青如滴問江南池館有
誰來江南客 烏衣巷今猶惜烏衣事今難覓但年年
燕子晚煙斜日抖擻一春塵土債悲涼萬古英雄迹且
芳樽隨分趁芳時休虛擲

景定建康志云烏衣園在城南二里烏衣巷之東一堂扁曰來燕歲久傾圮咸淳元年馬公光祖撤而新之堂後植桂亭曰綠玉香中梅花彌望堂曰百花頭上其餘亭館曰更屐曰穎立曰長春曰望岑曰挹華曰更好左右位置森列佳花美木芳蔭蔽虧非復曩時寒煙衰草之陋矣

南柯子

池水凝新碧
闌花駐老紅
有人獨倚畫橋東
手把一枝楊柳繫春風
鵲伴游絲墜
蜂粘落蕊空
鞦韆庭院小
簾櫳多少閑情閑緒雨聲中

景定建康志吳潛雨花臺再用前韵滿江紅云
瑪瑙岡頭左醜酒右持螯食懷舊處磨東冶劔
弄青溪笛望裏尙嫌山是障醉中要捲江無滴
這一堆心事總成灰蒼波客歎俛仰成今昔愁
易攬歡難覓正平蕪遠樹落霞殘日自咲頻招
猿鶴怨相期蚤混漁樵跡把是非得失與榮枯
虛空擲
開慶四明續志吳潛永遇樂己未元夕云祝告
天公放燈時節且收今雨萬戶千門六街三市
綻水晶雲母香車寶馬珠簾翠幙不怕禁更敲

五霓裳曲驚回好夢誤遊紫宮朱府沉思舊日
京華風景逗曉猶聽戲鼓分鏡圓時斷釵合處
倩咲歌與舞如今閑院蜂殘蛾褪消夜果邊自
語虧人殺_{去聲}梅花紙帳權將睡補滿江紅戊午
二月十七日四明窻賦云芳景無多又還是亂
紅飛墜空悵望昭亭深處家山桃李柳眼花心
都脫換蜂鬚蝶翅難沾綴謾相携一笑競良辰
春醪美金獸爇香風細金鳳拍歌雲賦儘秦簫
燕管但逢場爾只恐思鄉情味惡怎禁寒食清
明裏問此翁不止四宜休翁歸未
豹隱紀談徐參政清叟微時贈建寧妓唐玉詩
云上國新行巧樣花一枝聊挿鬢雲斜嬌羞未
肯從郎意故把芳容故遮吳履齋丞相和以
賀新郎詞云可意人如玉小簾櫳輕勺淡抹道
家妝束長恨春歸無尋處全在波明黛綠看冶
葉倡條渾俗比似江梅清有韵更臨風對月斜
依竹看不足詠不足曲屏半掩春山簇正輕寒
夜深花睡半歌殘燭縹緲九霞光裡夢香在衣

裳臙馥又只恐銅壺聲促試問送人歸去後對
一奩花影垂金粟腸易斷恨難續

至元嘉禾志吳潛水調歌頭題煙雨樓云有客
抱幽獨高立萬人頭東湖千頃煙雨占斷幾春
秋自有茂林修竹不用買花沽酒此樂若為酬
秋到天空濶浩氣與雲浮歎吾曹緣五斗尚遲
留練江亭下長憶閑了釣魚舟矧更飄搖身世
又更奔騰歲月辛苦復何求咫尺桃源隔他日
擬重遊

齊東野語朔齋劉震孫知宛陵毅夫丞相方閑
居劉日陪午橋之游後以召還吳餞之郊外劉
賦摸魚兒詞為別末云怕綠野堂邊劉郎去後
誰伴老裴度毅夫為之揮淚繼遣一价追和此
詞并侑以小奩啓之精金百星也前輩憐才賞
音如
此

尹
煥

煥字惟曉山陰人嘉定十年進士自畿漕除右司
郎官有梅津集

霓裳中序第一
茉莉

青輦粲素靨海國仙人偏耐熱餐盡香風露屑便萬里
凌空肯憑蓮葉盈盈步月悄似憐輕去瑤闕人何在憶
渠癡小點點愛輕撾 愁絕舊游輕別忍重看鎖香金
篋淒涼今夜簾席怕杳杳詩竟真化風蝶冷香清到骨
夢十里梅花霽雪歸來也厭厭心事自共素娥說

全芳備祖云素馨花舊名那悉茗一名野悉茗昔
劉鋹有侍女名素馨冢上生此花因以得名尹梅
津霓裳中序
第一云云

眼兒媚

垂楊裊裊蘸清漪明綠染春絲市橋繫馬旗亭沽酒無
限相思 雲梳雨洗風前舞一好百般宜不知為甚落
花時節都是顰眉

唐多令 苕溪有牧之感

蘋末轉清商溪聲供夕涼緩傳盃催喚紅妝慢綰烏雲
新浴罷拂拂地水沉香 歌短舊情長重來驚鬢霜悵
綠陰青子成雙說着前歡佯不佻颺蓮子打鴛鴦

齊東野語云尹梅津未第時薄游苕霅籍中適有所盼後十年問訊舊遊則久為宗子所據且育子

而猶挂名籍中於是假之郡將久而始來顏色瘁
赧不足膏沐相對若不勝情梅津為賦唐多令云
吳文英夢窻甲藁水龍吟壽尹梅津云望春樓
外滄波舊年照眼青銅鏡煉成寶月飛來天上
銀河流影紺玉鈎簾處橫犀塵天香分鼎記殷
雲殿瑣裁花剪露曲江畔春風勁槐省紅塵晝
靜午朝回吟生晚興春霖繡筆鶯邊清曉金猊
旋整閨苑芝生貌生綃對綠窻深景弄瓊英數
點宮梅信早
占年光永

趙以夫

以夫字用父號虛齋福之長樂人嘉定中正奏名
歷知邵武軍漳州皆有治績嘉熙初為樞密都承
旨二年拜同知樞密院事淳祐初罷尋加資政殿
學士進吏部尚書兼侍讀詔與劉克莊同纂修國
史

憶舊遊慢

荷花

望紅蕖影裏冉冉斜陽十里沙平喚起江湖夢向沙鷗
住處細說前盟水鄉六月無暑寒玉散清冰笑老去心
情也將醉眼鎮爲花青 亭亭步明鏡似月浸華清人
在秋庭照夜銀河落想粉香溼露恩澤親承十洲縹緲
何許風引綵舟行尙憶得西施餘情裊裊煙水汀

虛齋樂府徵韶咏雪云玉壺凍裂琅玕折駸駸
逼人衣袂暖絮張空飛失前山橫翠欲低還起
似妝點滿園春意記憶當時刻中情味一溪雲
水天際絕行人高吟處依稀灞橋隣里更剪剪
梅花落雲階月地化工真解事強勾引老來詩
思楚天暮驛使不來悵曲闌獨倚

姚鏞

鏞字希聲號雪篷剡溪人贛州守有雪篷集一卷
剡錄云姚鏞嘉定十年吳潛榜進士

謁金門

吟院靜遲日自行花影薰透水沉雲滿鼎晚妝窺露井
飛絮游絲無定誤了鶯鶯相等欲喚海棠教睡醒奈
何春不肯

羅椅

椅字子遠號礪谷癸辛雜識云羅椅廬陵人富家
子壯年捐金結客後爲饒雙峯高弟又以薦登賈
師憲之門丙辰第進士以秉義郎爲江陵教改潭
教及宰贛之信豐遷提轄權貨度宗升遐失於入

臨論罷

寶祐四年登科錄第二甲第三十人羅椅字子遠
小名天驥第七十一永感下年四十三二月十
五日寅時生外氏孫治賦四舉娶劉氏曾祖上達
祖維翰宣政郎父沂宣義郎本貫吉州廬陵縣化
仁鄉祖為戶

柳梢青

萼綠華身小桃花扇安石榴裙子野聞歌周郎顧曲曾

惱夫君悠悠羈旅愁人似零落青天斷雲何處銷覓

初三夜月第四橋春

詞旨警句何處銷覓初三夜月第四橋春柳梢青
翰墨全書羅椅八聲甘州孤山有感云甚匆匆
歲月又人家插柳記清明政南北高峯風傳笑
響如泛簫聲吹散樓臺煙雨鶯語諳也春晴何

所無芳艸惟此青青誰管孤山山下任種梅月
冷薦菊泉清看人情如此沉醉不須醒問何時
樊川歸去嘆故鄉七十五長亭君知否洞雲溪
月咲我飄零

方岳

岳字巨山號秋崖祁門人紹定五年進士兩為文
學掌故官中祕書出守袁州有秋崖先生詞藁

江神子

丹牡

窻綃深掩護芳塵翠眉顰越精神幾雨幾晴做得這些

春切莫近前輕著語題品錯怕花嗔碧壺難貯玉粼

粼碎香茵晚風頻吹得酒痕如洗一番新只恨謫仙渾

嬾事辜負却倚闌人

秋崖詞藁滿江紅九日登冶城樓云且問黃花
陶令後幾番重九應解咲秋崖人老不堪詩酒
宇宙一舟吾倦矣山河兩戒君知否倚西風無
奈劍花寒虬龍吼江欲醞談天口秋何負持螯
手儘石麟蕪沒斷煙衰柳故國山圍青玉案何
人印佩黃金斗倘只消江左管夷吾終須有

楊伯岳

伯岳字彥瞻號泳齋楊和王諸孫居臨安淳祐間
除工部郎出守衢州錢唐薛尚功之外孫弁陽周
公謹之外舅也有六帖補二
十卷九經補韵一卷行世

踏莎行
雪中疎寮借閣帖
更以薇露送之

梅觀初花蕙庭殘葉當時慣聽山陰雪東風吹夢到清
都今年雪比年前別 重釀宮醪雙鈎官帖伴翁一笑

成三絕夜深何用對青藜窗前一片蓬萊月

法帖譜系云熙陵以武定四方載橐弓矢文治之
餘留意翰墨乃出御府歷代所藏真蹟命侍書王
著摹勒刻板禁中釐爲十卷此歷代法帖之祖
格古要論云太宗搜訪古人墨蹟於淳化中命侍
書王著摹勒作十卷用棗木板刻置祕閣上有銀
錠紋用澄心堂紙李庭珪墨拓打以手揩之墨不
汚手親王大臣各賜一本人間罕得
讀書附志云淳熙祕閣續法帖十卷淳熙十二年
三月十九日奉聖旨摹勒鍾繇諸人帖
武林舊事云諸色酒名薔薇露流香並御庫
中興館閣續錄云高似孫字續古鄞縣人淳熙十
一年進士慶元五年十月除秘書省校書郎六年
二月通判徽州

周晉

晉字明叔
號嘯齋

點絳脣

訪牟存叟
南漪釣隱

午夢初回捲簾盡放春愁去晝長無侶自對黃鸝語

絮影蘋香春在無人處移舟去未成新句一研梨花雨

癸辛雜識云牟端明園本郡志南園後歸李寶謨
其後又歸牟存齋園中有碩果軒大梨一株元祐
學堂芳菲二亭萬鶴亭茶蘼雙李亭桴舫齋岷峨
一畝宮前枕大溪曰南漪小隱吳興掌故集云牟
子才字存叟其先并研人愛吳興山水清遠因家
湖州之南門

清平樂

圖書一室香暖垂簾密花滿翠壺薰研席睡覺滿窗晴

日手寒不了殘碁籌香細勘唐碑無酒無詩情緒欲

梅欲雪天時

珊瑚網郭昇手書此詞跋云大德十一年歲丁
未十月初十日客寓燕山奔走暮歸黃塵滿面
挑燈讀此詞一過想
像江南如夢中也

柳梢青

楊花

似霧中花似風前雪似雨餘雲本自無情點萍成綠却

又多情 西湖南陌東城甚管定年年送春薄倖東風

薄情遊子薄命佳人

楊纘

續字繼翁嚴陵人居錢唐寧宗楊后兄次山之孫
號守齋又號紫霞翁圖繪寶鑑云度宗朝女爲淑
妃官列卿好古博雅善琴有紫霞洞譜傳世時作
墨竹

八六子

牡丹次
白雲韵

怨殘紅夜來無賴雨催春去
怱怱但暗水新流芳恨
蛩
凄蜂慘千林嫩綠迷空
那知國色還逢柔弱華清
扶倦
輕盈洛浦臨風
細認得凝妝點脂勻粉
露蟬聳翠蕊
金團玉成叢幾許愁隨
笑解一聲歌轉春融
眼朦朧凭
闌干半醒醉中

一枝春

除夕

竹爆驚春競喧填
夜起千門簫鼓流蕪帳
暖翠鼎緩騰
香霧停杯未舉
奈剛要送年新句
應自有歌字清圓未
誇上林鶯語
從他歲窮日莫縱閑愁
怎減劉郎風度
屠蕪辦了迤邐柳欺梅
妬宮壺未曉
早驕馬繡車盈路
還又把月夜花朝
自今細數

武林舊事云守歲之詞雖多極難其選獨守齋一
枝春最爲近世所稱

被花惱

自度
腔

踈踈宿雨釀寒輕
簾幙靜垂清曉
寶鴨微温
瑞煙少簷
聲不動春禽對語
夢怯頻驚
覺欹珀枕倚銀牀
半窻花

影明東照 惆悵夜來風生怕嬌香混瑤草披衣便起
小徑回廊處處多行到正千紅萬紫競芳妍又還似年
時被花惱驀忽地省得而今雙鬢老

詞旨詞眼
蝶凄蜂慘

翁孟寅

孟寅字賓賜號五峰錢唐人四朝聞見錄云翁孟寅其先本建之崇安人祖中丞彦國偽楚張邦昌僭帝時嘗提兵勤王為李丞相綱之亞父謙之進士孟寅首登臨安鄉書

齊天樂

紅香十里銅駝夢如今舊遊重省節序飄零歡娛老大

慵立燈光蟾影傷心對景怕回首東風雨晴難準曲巷
幽坊管絃一片笑相近 飛棚浮動翠葆看金釵半溜
春爐紅粉鳳輦鰲山雲收霧歛迤邐銅壺漏迥霜風漸
緊展一幅青綃爭懸孤鏡帶醉扶歸曉醒春夢穩

燭影搖紅

樓倚春城瑣窗曾共巢春燕人生好夢逐春風不似楊
花健舊事如天漸遠奈晴絲牽愁未斷鏡塵埋恨帶粉
棲香曲屏寒淺 環珮空歸故園羞見桃花面輕煙殘
照下欄杆獨自踈簾捲一信狂風又晚海棠花隨風滿

院亂鴉歸後杜宇啼時一聲聲怨

阮郎歸

月高樓外柳花明單衣怯露零小橋燈影落殘星寒煙
蘸水萍 歌袖窄舞環輕梨花夢滿城落紅啼鳥兩無
情春愁添曉醒

吳文英夢窗乙藁江神子送翁五峯自鶴江還
都云西風一葉送行舟淺遲留艤汀洲新浴紅
衣綠水帶香流應是離宮城外晚人竚立小簾
鈎新歸重省別來愁黛眉頭半痕秋天上人間
斜月綉針樓湖浪莫迷
花蝶夢江上約負輕鷗

趙汝茆

汝茆字參晦號霞山宋史宗室世
系表商王元份八世孫善官子

梅花引

對花時節不曾歡見花殘任花殘小約簾櫳一面受春
寒題破玉楸雙喜鵲香燼冷遶雲屏渾是山 待眠未
眠事萬千也問天也恨天髻兒半偏繡裙兒寬了又寬
自取紅氈重坐暖金船惟有月知君去處今夜月照秦
樓第幾間

夢江南

簾不捲細雨熟櫻桃數點霽霞天又曉一痕涼月酒初

消風緊絮花高 蕭閑處磨盡少年豪
昨夢醉來騎白鹿 滿湖春水段家橋
濯髮聽吹簫

戀繡衾

柳絲空有萬千條 繫不住溪頭畫橈
想今宵也對新月 過輕寒何處小橋
玉簫臺榭春多少 溜啼痕盈臉未
消 怪別來燕支慵傅 被春風偷在杏梢

漢宮春

著破荷衣笑西風 吹我又落西湖
湖間舊時飲者 今與誰俱
山山暎帶似携來 畫卷重舒
三十里芙蓉步障 依

然紅翠相扶 一目清無留處
任屋浮天上 身集空虛
殘燒夕陽過雁 點點踈踈
故人老大好襟懷 消減全無
漫贏得秋聲兩耳 冷泉亭下騎驢

如夢令

小砑紅綾牋紙 一字一行春淚
封了更親題題了 又還
折起歸未歸 未好箇瘦人天氣

詞旨警句 怪別來臙脂慵傅 被東風偷在杏梢 戀繡衾

馮去非

去非字可遷 號深居南康都昌人 淳祐元年進士 幹辦淮東轉運司寶祐四年召爲宗學諭

喜遷鶯

涼生遙渚正綠芰擎霜黃花招雨鴈外漁燈葦邊蟹舍
絳葉表秋來路世事不離雙鬢遠夢偏欺孤旅送望眼
但憑舷微笑書空無語 慵看清鏡裏十載征塵長把
朱顏污借箸青油揮毫紫塞舊事不堪重舉間濶故山
猿鶴冷落同盟鷗鷺倦遊也便檣雲拖月浩歌歸去

吳文英夢窓丙橐燭影搖紅餞馮深居翼日深
居初度云飛蓋西園晚秋恰勝春天氣霜花開
盡錦屏空紅葉新裝綴時放清杯泛水暗淒涼
東風舊事夜吟不就松影闌干月籠寒翠莫唱
陽關但憑綵袖歌千歲秋星入夢隔明朝十載
吳宮會一棹回潮渡葦正西窻燈花報喜柳蠻

櫻素試酒爭
憐不教不醉

許棐

棐字忱夫海鹽人嘉熙中隱居秦溪於水南種梅
數十樹自號梅屋室中懸白香山蘓東坡二像事
之人有奇編見無不錄以故環室皆書著有獻醜
集一卷梅屋藁三卷融春小綴一卷樵談一卷梅
屋詩餘一卷

鷓鴣天

翠鳳金鸞繡欲成沉香亭下欵新晴綠隨楊柳陰邊去
紅踏桃花片上行 鶯意緒蝶心情一時分付小銀箏
歸來玉醉花柔困月瀟紗窻約半更

琴調相思引

組繡盈箱錦滿機
倩人縫作護花衣
恐花飛去無復上
芳枝已恨遠山迷
望眼不須更畫遠
山眉正無聊賴
雨外一鳩啼

後庭花

一春不識西湖面
翠羞紅倦雨窗和
淚搖湘管意長
短知心惟有雕梁
燕自來相伴東風
不管琵琶怨落花
吹遍

梅屋詩餘滿宮春云
嬾搏香慵弄粉猶帶淺醒
微困金鞍何處掠新歡
倩燕鶯尋問柳供愁花

獻恨袞絮獵紅成
陳碧樓能有幾番春
又是一番春盡
虞美人云杏花窻底
人中酒花與人相
守簾衣不肯護春寒
一聲嬌嚏兩眉攢
擁衾眠
明朝又有秋千約
恐未忺梳掠倩誰傳
語畫樓風畧吹絲雨
濕春紅絆遊蹤
山花子云按柳揉花
旋染衣絲絲紅翠撲
春輝羅綺叢中無此
艷小西施腰細最便
圍舞帕袖寒時復罩
香匝誤點一痕殘
粉淚怕人知

陸叡

叡字景思號雲西會稽人
會稽續志進士表紹定
五年徐元杰榜陸叡
佃五世孫景定建康志
陸叡淳祐中沿江制置使
參議除禮部員外崇政殿說
書

瑞鶴仙

溼雲黏鴈影
望征路愁迷
離緒難整
千金買光景
但踈

鐘催曉亂鴉啼暝花惊暗省許多情相逢夢境便行雲
都不歸來也合寄將音信 孤迥盟鸞心在跨鶴程高
後期無準情絲待剪翻惹得舊時恨怕天教何處參差
雙燕還染殘朱剩粉對菱花與說相思看誰瘦損

詞旨警句對菱花與說
相思看誰瘦損瑞鶴仙

蕭泰來

泰來字則陽號小山臨江人紹定二年進士有小
山集癸辛雜識云泰來理宗朝為御史附謝丞相
為右司李伯玉所劾姚
希得指為小人之宗

霜天曉角

梅

千霜萬雪受盡寒磨折賴是生來瘦硬渾不怕角吹徹
清絕影也別知心惟有月元沒春風情性如何共海

棠說

庶齋老學叢談云此作與王瓦全梅詞命意措詞
畧相似

詞旨警句清絕影也別
知心惟有月霜天曉角

趙希邁

希邁字端行詞本作瑞行誤號西里永嘉人宋史
宗室世系表燕王德昭九世孫師僚第三子續文
獻通考云趙希邁著
有西里稿高踈寮跋

八聲甘州

竹西
懷古

寒雲飛萬里一番秋一番攪離懷向隋堤躍馬前時柳
色今度蒿萊錦纜殘香在否枉被白鷗猜千古揚州夢
一覺庭槐 歌吹竹西難問拚菊邊醉著吟寄天涯任
紅樓踪跡茅屋染蒼苔幾傷心橋東片月趁夜潮流恨
入秦淮潮回處引西風恨又渡江來

詩話總龜云蜀岡者維揚之地也蜀岡之南有竹西亭修竹踈翠後卽禪智寺也取杜牧之斜陽竹西路歌吹是揚州自蜀岡以南景氣頓異北風至此遂絕

葛洞江都志云竹西亭在城北五里禪智寺側向子固易曰歌吹經紹興兵火周涼重建復舊名

趙崇礪

崇礪字漢宗號白雲南豐人嘉定十六年進士授石城令改淳安嘗上疏極論儲嗣未定及中人專橫官至大宗丞有白雲稿宋史宗室世系表商王元份九世孫汝悉長子

蝶戀花

一剪微寒禁翠袂花下重開舊燕添新壘風旋落紅香
匝地海棠枝上鶯飛起 薄霧籠春天欲醉碧草澄波
的的情如水料想紅樓挑錦字輕雲淡月人憔悴

菩薩蠻

桃花相向東風笑桃花忍放東風老細草碧如煙薄寒
輕暖天 折釵鸞作股鏡裏參差舞破碎玉連環捲簾

春睡殘

趙希彭

一作觀

希彭字清中號十洲四明人宋史宗室世系表燕王九世孫師鄭長子延祐四明志寶慶二年王會龍榜進士

霜天曉角

桂

姮娥戲劇手種長生粒寶榦婆娑千古飄芳吹滿虛碧
韵色檀露滴人間秋第一金粟如來境界誰移在小
亭側

秋蕊香

髻穩冠宜翡翠壓鬢綵絲金蕊遠山碧淺蘸秋水香煖
榴裙襯地 寧寧二八餘年紀惱春意玉雲凝重步塵
細獨立花陰寶砌

王澡

澡字身甫號瓦全庶齋老學叢談云澡四明人有瓦全集文獻通考王澡寧海人太常博士初名津知字子

霜天曉角

梅

踈明瘦直不受東皇識留與伴春應肯干紅底怎著得
夜色何處笛曉寒無奈力飛入壽陽宮裏一點點有

絕妙子詞卷之三

絕妙子詞卷之三

七

人惜

方岳深雪偶談云太常博士瓦全王先生有落梅小詞云云劉公潛夫已附于後村集詩話中予亦僭附之拙稟雖然先生文行表表一詞固何足為先生軒輊也予少時即登門以先公同生丙戌且相友善之故遂辱撰先公墓銘誌中有文不逮岳而岳強以銘之語當知前輩獎掖後進有如此也

趙與鄒詞本誤作鑿

與鄒字慶御號崑崙宋史宗室世系表燕王十世孫希泝第三子

謁金門

歸去去風急蘭舟不住夢裏海棠花下語醒來無覓處
薄倖心情似絮長是輕分輕聚待得來時春幾許綠

陰三月莫

樓槃

槃字考甫號曲澗

霜天曉角梅

月淡風輕黃昏未是清吟到十分清處也不啻二三更
曉鐘天未明曉霜人未行只有城頭殘角說得盡我

平生

又

剪雪裁冰有人嫌太清又有人嫌太瘦都不是我知音

誰是我知音孤山人姓林一自西湖別後辜負我到
如今

鍾過

過字改之號梅心廬陵人
中寶祐三年乙卯解試

步蟾宮

東風又送酴醿信
蚤吹得愁成潘鬢
花開猶似十年前
人不似十年前俊
水邊珠翠香成陣
也消得燕窺鶯
認歸來沉醉月朦朧
覺花氣滿襟猶潤

詞旨警句
句花開猶似十年前
人不似十年前俊
步蟾宮

詞眼燕
窺鶯認

李肩吾

肩吾字子我號蠙洲眉州人精六書之學嘗著字
通爲魏鶴山之客虞集字通序云李君在魏文靖
公門下有師友之道焉

撾毬樂

風腎薦紅雨易晴
病花中酒過清明
綺窗幽夢亂於柳
羅袖淚痕疑似飭
冷地思量著春色
三停早二停

風流子

雙燕立虹梁
東風外煙雨濕
流光望芳草
雲連怕經南

浦葡萄波漲怎博西涼空記省殘妝眉暈歛臂袖唾痕
香春滿綺羅小鶯捎蝶夜留絃索么鳳求凰 江湖飄
零久頻回首無奈觸緒難忘誰信溫柔牢落翻墮愁鄉
便別本作使非玉箋銅爵花間陶寫瑤釵金鏡月底平章十
二主家樓苑應念蕭郎

清平樂

美人嬌小鏡裏容顏好秀色侵人春帳曉郎去幾時重
到 叮嚀記取兒家碧雲隱映紅霞直下小橋流水門
前一樹桃花

風入松

冬至

霜風連夜做冬晴曉日千門香葭暖透黃鐘管正玉臺
彩筆書雲竹外南枝意早數花開對清樽 香閨女伴
笑輕盈倦繡停針花磚一線添紅景看從今迤邐新春
寒食相逢何處百單五箇黃昏

烏夜啼

徑蘚痕沿碧甃簷花影壓紅闌今年春事渾無幾游冶
嬾情慳 舊夢鶯鶯沁水新愁燕燕長干重門十二簾
休捲三月尙春寒

清平樂

東風無用吹得愁眉重有意迎春無意送門外溼雲如
夢韶光九十慳慳俊遊回首關山燕子可憐人去海
棠不分春寒

鷓鴣天

綠色吳箋覆古苔濡毫重擬賦幽懷杏花簾外鶯將老
楊柳樓前燕不來倚玉枕墜瑤釵午窗輕夢繞秦淮
玉鞭何處貪游冶尋徧春風十二街

詞旨警句叮嚀記取兒家碧雲隱映紅霞直下小
橋流水門前一樹桃花清平樂

黃

簡

柯氏刊本作闌高氏作蘭俱誤
簡一名居簡字元易號東浦文肇社虎邱志云黃
居簡字元易建安人工詩嘉熙中卒通判翁逢龍
墓之虎邱王鏊姑蘇志云漳潭陳氏北園范石湖
書扁東浦黃簡為記即其人也

柳梢青

病酒心情喚愁無限可奈流鶯又是一年花驚寒食柳
認清明天涯翠巘層層是少長亭短亭倦倚東風
只憑好夢飛到銀屏

玉樓春

龜紋曉扇堆雲母日上綵闌新過雨眉心猶帶寶觥醒

耳性已通銀字譜 密奩綵索看看午暈素分紅能幾
許妝成接鏡問春風比似庭花誰解語

陳 策

策字次賈號南墅上
虞人以功授武階

摸魚兒

仲宣樓賦

倚危梯酌春懷古輕寒纔轉花信江城望極多愁思前
事惱人方寸湖海興算合付元龍舉白澆談吻憑高試
問問舊日王郎依劉有地何事賦幽憤 沙頭路休記
家山遠近賓鴻一去無信滄波渺渺空歸夢門外北風

淒緊烏帽整便做得功名難綠星星鬢敲吟未穩又白
鷺飛來垂楊自舞誰與寄離恨

李曾伯可齋雜橐仲宣樓記畧云按江陵志樓名
昉於祥符復於紹興淳祐十年賈公似道爲制置
使重新是樓夏六月易鎮全淮覃懷李某繼之如
前畫越半葦告成蜡月二十有五日夜集賓校置
酒而落之又點絳唇餞陳次賈云嬾上巍樓楚江
一望天無際漫游萍寄莫挽東流水一片秋光直
到山陰里人還記戍邊歸未更憶鱸魚美又齊天
樂和陳次賈爲壽韵云今年塞上秋來早昂街尙
餘苾曜舉日關河驚心弧矢顧我豈堪戎纛幾番
鳳誥愧保障何功恩隆旒藻笑指呼鷹露花煙草
憶劉表頭顱如許相與歲寒猶賴有白髮公道對
月懷人臨風訪古往事淒涼難考何時是了莫馳
志伊吾貪名清廟松菊歸來稽山招此老按淳祐
中可齋爲荊州闔帥次賈在賓幕相與倡和此詞

正作於仲宣樓落成之日也
江陵志餘云仲宣樓在城東南隅憑墉結構列榭
參差相傳後梁高季興所建望沙樓也陳堯佐鎮
荆乃易今名然登樓賦注言樓在江陵梁孝元出
江陵縣還詩朝出屠牛縣夕反仲宣樓先賢傳亦
云荆州有王祭宅則樓屬江陵亦自有據不必泥
指當陽襄陽爲定案也

滿江紅

楊花

倦繡人閑恨春去淺顰輕掠章臺路雪黏飛燕帶芹穿
幕委地身如遊子倦隨風命似佳人薄歎此花去後更
無花情懷惡心下事誰堪託憐老大傷飄泊把前回
離恨暗中描摸又趁扁舟低欲去可憐世事今非昨看

等閑飛過女墻來鞦韆索

黃

高氏刊本
作晷誤

曷字叔賜號玉林胡季直云玉林蚤棄科舉雅意
讀書吟咏自適游受齋稱其詩爲晴空冰柱樓秋
房聞其與魏菊莊友善并以泉石清士目之有絕
妙詞選二十卷散花菴詞一卷

清平樂

宮詞

珠簾寂寂愁背銀釭泣記得少年初選入三十六宮第
一當時掌上承恩而今冷落長門又是羊車過也月
明花落黃昏

詞旨警句又是羊車過也月明花落黃昏清平樂
散花菴詞浪淘沙云秋色滿層霄翦翦寒飈一

襟殘照兩無聊數盡歸鴉人不見落木蕭蕭往
事欲魂消夢想風標春江綠漲水平橋側帽停
鞭沽酒處
柳軟鶯嬌

李振祖

振祖號中山寶祐四年登科錄第四甲第十三人
李振祖字起翁第萬一慈侍下年四十六二月丁
酉日丑時生外氏趙一舉娶劉氏曾祖簡能御史
祖皎承義郎父寧本貫福州閩縣祖爲戶

浪淘沙

春在畫橋西畫舫輕移粉香何處度漣漪認得一船楊
柳外簾影垂垂誰倚碧闌低酒暈雙眉鴛鴦並浴燕
交飛一片閑情春水隔斜日人歸

薛夢桂

夢桂字叔載號梯颺永嘉人寶祐癸丑姚勉榜進
士嘗知福清縣四朝聞見錄云夢桂父公圭紹熙
五年上書光宗請建儲東嘉姓譜云薛夢桂仕至
平江倅

醉落魄

單衣乍着滯寒更傍東風作珠簾壓定銀鈎索雨弄新
晴輕旋玉塵落花唇巧借妝紅約嬌羞纔放三分萼
樽前不用多評泊春淺春深都向杏梢覺

眼兒媚

綠牋

碧筒新展綠蕉芽黃露灑榴花蘸煙染就和雲捲起秋

水人家 只因一朵芙蓉月生怕黛簾遮燕銜不去鴈
飛不到愁滿天涯

三姝媚

薔薇花謝去更無情連夜送春風雨燕子呢喃似念人
憔悴往來朱戶漲綠煙深早零落點池萍絮暗憶年華
羅帳分釵又驚春莫 芳草淒迷征路待去也還將畫
輪留住縱使重來怕粉容銷膩却羞郎覷細數盟言猶
在悵青樓何處縮盡垂楊爭似相思寸縷

浣溪紗

柳映疎簾花映林春光一半幾銷魂新詩未了枕先溫
昏
燕子說將千萬恨海棠開到二三分小窗銀燭又黃

曾揆

揆字舜卿號
嬾翁南豐人

西江月

欄雨輕敲夜夜牆雲低度朝朝日長天氣已無聊何況
洞房人悄 眉共新荷不展心隨垂柳頻搖午眠彷彿
見金翹驚覺數聲啼鳥

錢唐汪
陳 沆
皋 同校勘

絕妙好詞箋卷三終

